

# Xiboxrlaexr Sul

## 1

### Arbosobo Ddei Ssor Bir Tisir Leil Ddo Leixl

<sup>1</sup> Halleix niul ddei porpor mel gol dae seir car, Arbosobo mel baxlfaxr hormo yoxr nei sser a, xiezi mel leil miardal a, yaa dax ddar hormo boxl nei biar lol; <sup>2</sup> eilleix nixixl maelele ddei gga nael, yar yoxl yar Ssor leil miardal a niul dax ddar biar lol. Arbosobo yar Ssor leil ngol dae a merlo-milo cirza-hanga bei. Yar yoxl yar Ssor leil tiur teixl lei a merlo-milo maelmaerjjia li wo su ddei loxr lol. <sup>3</sup> Yar mel Arbosobo dax ciryoxr a bbobbolbbo zza, Arbosobo lesel gaxzi. Yel yar Arbosobo arsaesael nga ca mel leil saexl lol var. Yar ddar yarzi ddo bbeix a, cirza-hanga maelmaerjjia leil guaxr doxr dae. Yar ca ddei zuixl mel bei pixl gger ho a, merlabbor hher dae cirza-hanga ddo zzir Arbosobo ddei yo piar a gga cux dae a. <sup>4</sup> Yel yar bir cirza-hanga tisir leil vaer leixl, hherdder yar ddei mi ddei lei tisir leil vaer leixl.

<sup>5</sup> Arbosobo yar Ssor Yisu leil bbeix goxr ddar mel zeixleixr lei tisir arddol ddei leil bbeix nr goxr. Yar bbeix:

“Ni mel ngo ddei Ssor a; eilni ngo Niabbor bei a.”<sup>a</sup>

“Ngo mel Yarbbor bei nia, yar mel ngo Ssor bei nia,”<sup>b</sup>

eine bbeix a.

<sup>6</sup> Arbosobo yar ddei Ssor vaervaer leil middurbbor lei lol car, yar bbeix:

---

<sup>a</sup>1:5 Sipi Sul 2:7 leil vaexr dae.

<sup>b</sup>1:5 Sarmur'aer Sul Vaexr Maele Ber 7:14 leil vaexr dae.

“Ngo ddei tisir maelmaerjjia lei yar leil bbeix zae gger nia.”<sup>c</sup>

<sup>7</sup> Tisir mel leil biar ci a nael, Arbosobo yoxl bbeix:

“Ngo ngo ddei tisir mel leil mersi sael a nga lol,  
ngo leil visser su mel leil adoxl sael a nga lol.”<sup>d</sup>

<sup>8</sup> Yar ddei Ssor ddei leil biar ci a nael, yar yoxl bbeix:

“Ni mel Arbosobo a; ni cirse-cirsil zzirmar bei doxr dae,  
ni bbaehhexhhexmo zzirmar bei.

<sup>9</sup> Ni mel bei hoxr gaxzi mel leil nolnger,  
Lixlfaxr dax bei nr mae mel leil vuxryixr;  
yel ni ddei Arbosobo hherdder ngo ni leil ssuvi dox deix gger,<sup>e</sup>  
ni leil ggese lol, bir ni ddei carbeix mel leil ggese leixl lol.”<sup>f</sup>

<sup>10</sup> Yoxl bbeix:

“Azo lei nr zza seir, Seirpor, ni mel middurbbor ddei bei beil a;  
merlabbor ddei lei ni bei teixl lei a.

<sup>11</sup> Merlabbor middurbbor mel pia sael a xiaxr var, mier var,  
nael ni mel cirse-cirsil lei gol doxr dae;

---

<sup>c</sup> **1:6** Sipi Sul 97:7 leil vaexr dae.

<sup>d</sup> **1:7** Sipi Sul 104:4 leil vaexr dae.

<sup>e</sup> **1:9** Ca oldde ddei leil ssuvi dox deix gger mel dder bbeix Arbosobo ca leil tiur teixlleil a, yar leil i du. Bir dae a bbeix, xiezi bei, zzirmar bei a eine dox deix. Halleix Yoxrtaexl su ca mel eine bei zza wo.

<sup>f</sup> **1:9** Sipi Sul 45:6-7 leil vaexr dae.

<sup>12</sup> Ni merlabbor middurbbor leil lei teixlsibbor pia xiux sael a jur gex  
du lei a,  
pia lael sae a lael box gger nia,  
nael ni mel gierbox nixixl nr zza,  
cirse-cirsil lei gol doxr dae,”<sup>g</sup>

eine bbeix a.

<sup>13</sup> Arbosobo yar Ssor Yisu leil bbeix goxr ddar mel zeixleixr lei tisir  
arddol ddei lei bbeix nr goxr. Yar bbeix:

“Ni ngo yo piar a gga cux dae,  
ngo leil xia dae a ni leil vuxryixr su ca mel leil deil leixl gger a,  
ni qihher woxrke jjiux ji dae lol, hane zzeze ci.”<sup>h</sup>

eine bbeix a.

<sup>14</sup> Tisir<sup>i</sup> mel mel Arbosobo leil visser su xiu lar cirmel a; Arbosobo yaa leil  
miardal a, yar jiuxl wo ca mel leil beijjiu ssi lol.

## 2

### Yisu Ca Mel Leil Jiuxl A Holcir Dae Nia

<sup>1</sup> Yel niul gielgiel niul bbejjiur wo Yisu leil biar dae ddarzi mel leil  
zabbar seilseir a holcir dae nia; nr nga a ajjix pe dae mel sael a pe pixl si  
leilei, hherdder ho bei ho Yisu dax bei nr mae. <sup>2</sup> Arbosobo tisir mel leil  
miardal a niul leil biar gger lol Moxrxi ddei ddar mel yarzi a; yel ddar eil  
mel leil dir su nei no-nr-ni su ca hazza leil mel bbaehhexhhexmo faxr ho

---

<sup>g</sup>**1:12** Sipi Sul 102:25-27 leil vaexr dae.

<sup>h</sup>**1:13** Sipi Sul 110:1 leil vaexr dae.

<sup>i</sup>**1:14** *Tisir* Tisir mel mel Arbosobo coxl teixl lei xiu armel a.

a. <sup>3</sup> Arbosobo Seirpor Yisu leil ngol dae a niul leil jiuxl a; nael niul eil mel leil i nr du arddeirnga a mel, Arbosobo gielgiel niul leil faxr nia. Arbosobo niul leil jiuxl yarzi zoxlyoxl eil ddei mel Seirpor Yisu hoba niul leil biar gger goxr a. Giedae ci a Yisu biar ggie bbejjiur wo su ca mel yoxl niul leil biar gger a, eil mel yarzi a niul leil saexl lol. <sup>4</sup> Arbosobo yoxl yar xiar dae mel dax zox dae a, yar leil ddarzzi su mel leil ddoddomo murgurgurmo hal mel bei lol, halae yar ddei Xiu ddei yaa leil gger a, cirza-hanga bei bbesur zza lol a, Yisu leil biar dae ddarzi mel yarzi a niul leil saexl lol.

<sup>5</sup> Arbosobo mel tisir mel leil eilni-arggeni middurbbor ddei leil guaxr quexrlixl ddei nr gger. Middurbbor eil ddei mel niul biar dae ddei nga a.

<sup>6</sup> Nael Arbosobo Ddei Sul ber gga ca ar ddei a bbeix goxr a bbeix:

“Arbosobo, ca mel azo suax bbeixleir? Ni halae yaa leil holcir dae.

Ca Ddei Ssor<sup>j</sup> ddei yoxl azo suax bbeixleir? Ni halae yar leil perniar dae.

<sup>7</sup> Ni yar leil bir tisir leil arleixr ye lol goxr,

nael giedae yar leil yarzi quexrlixl zza lol, arseir lei yar leil i du lol,

<sup>8</sup> yar leil merlo-milo hazza-hamaer leil guaxr lol.”<sup>k</sup>

Yilsi mel dder yar nr guaxr lei ar yoxr nr zza. Nael eilcar a niul halae hazza-hamaer lei yar ddar no ggie nr mia seir. <sup>9</sup> Niul mia dae mel hherdder Yisu mel bir tisir leil arleixr ye goxr; Arbosobo mel ca leil cirza-hanga seirseir mel meixl gger a, Yisu ca maelmaerjjia leil weix a goxr sol a si a; yel giedae Arbosobo yoxl yar leil yarzi quexrlixl zza lol,

---

<sup>j</sup>2:6 *Ca Ddei Ssor* Eilmaex “Ca Ddei Ssor” bbeix a mel ca cirmelmel a zzir dae a Yisu leil bbeix, ca cirmelmel a zzir dae a ca leil bbeix.

<sup>k</sup>2:8 Sipi Sul 8:4-6 leil vaexr dae.

arseir lei yar leil i du lol, eil mel nga a.

<sup>10</sup> Hazza-hamaer lei Arbosobo bei teixl lei a; eil mel mel Arbosobo leil weix a bei arddeir a. Yel Arbosobo yar ddei ssormine cirke leil middux lol niazzir a, yar dder yaa leil jiuxlsu Yisu ddei leil si lol a, yar leil seirceix-seirmaer loxr lol. Arbosobo eine bei a mel hoxr arddeir a. <sup>11</sup> Yisu mel ca mel leil botaddu nr zza seirceix-seirmaer loxr lol. Yar nei seirceix-seirmaer loxr ho ca mel mel cir hhexr a nga; yel Yisu ca eil mel leil yar ddei nimar yar ddei nimo a bbeix a lei seixl-nr-da. <sup>12</sup> Yar Arbosobo leil bbeix:

“Ngo, ni ddei mi ddei, ngo ddei nimar ngo ddei nimo mel leil biar gger nia,  
ngo yaa dax ni leil bbeix zae gger nia.”<sup>l</sup>

<sup>13</sup> Yar lei bbeix:

“Ngo Arbosobo leil koxl nia.”<sup>m</sup>

Yar yoxl bbeix:

“I ddo a. Ngo nei Arbosobo ngo leil gger aniuX mel lei cirgo a eilmaex gga hher dae a.”<sup>n</sup>

<sup>14</sup> Arbosobo ddei aniuX mel mel hoxrneixr niar dae ggecir ar ddei zza,

---

<sup>l</sup>**2:12** Sipi Sul 22:22 leil vaexr dae.

<sup>m</sup>**2:13** Yirsaexlyal Sul 8:17 leil vaexr dae.

<sup>n</sup>**2:13** Yirsaexlyal Sul 8:18 leil vaexr dae. “Arbosobo ngo leil gger aniuX” mel dder Arbosobo ngo leil gger ca mel nga a. Yaa Arbosobo leil ddarzzi su mel nga a.

yel Yisu lei yaa sael a ca loxr a, hoxrneixr niar dae ggecir ar ddei zza.<sup>o</sup> Yisu mel si a, ca leil si lol bbesur zza neir zzirmar<sup>p</sup> te leil bei leixl gger a, <sup>15</sup>yar halae cir se lei si lei a gexr doxr dae zebol sael a gol dae ca hal mel leil piur teixl lei a. <sup>16</sup>Yisu mel tisir mel leil beijjiu lei nr nga a nei, Yalboxrlahar giedae ca mel leil beijjiu lei arddeir a.<sup>q</sup> <sup>17</sup>Yel yar ca mel leil beijjiu niazzir a mel, yar dder cirza-hanga lei yar ddei nimar yar ddei nimo dax ciryoxr a nga nia, eine nga a mel yar dder Arbosobo leil zi su vaer zzir yarzi koxlsseiddo hal ddei loxr a. Yar mel ca leil lei yarzi zoxlnixr. Yar halae Arbosobo leil zilabox ddei loxr a, olga ddei niul ca mel leil dir gger ssi a, Arbosobo ca ddei zuixl mel bei pixl gger a. <sup>18</sup>Yar leil sixr i car, yar goxrsol-goxrnaxr hal mel goxr goxr a; yel yar cirza-hanga sixr i dae hal mel pex dae su ca mel leil beijjiu var.

### 3

#### Yisu Bir Moxrxi Leil Ddo Leixl

<sup>1</sup> Eine nga a Arbosobo tiur teixl lei seirceix-seirmaer arzzi-nimar arzzi-nimo mel, nia Yisu leil holcir dae nia; yar mel dder Arbosobo miardal dae ca hal ddei nga a; halae niul ddei Arbosobo leil zi su vaer zzir ddei nga a. Niul yar leil ddarzzi a yar arseir a ca mel leil biar gger a. <sup>2</sup>Yar leil mel yarzi koxlsseiddo, yar leil miardal su Arbosobo ddei yar leil

---

<sup>o</sup>**2:14** *hoxrneixr niar dae ggecir ar ddei zza* Yisu hoxrneixr niar dae ggecir ar ddei zza a saelnei ca sael a si var.

<sup>p</sup>**2:14** *neir zzirmar* Neir zzirmar mel dder Sardaxl te nga a.

<sup>q</sup>**2:16** Yalboxrlahar giedae ca mel hherdder Arbosobo leil ddarzzi su mel nga a; Arbosobo ddei cassor-worssor mel nga a. Loxrmar Sul 4:11-12 nei 4:16 halae Jialataexl Sul 3:7 nei 3:9 leil biar dae.

azo bei lol a mel yar dder azo bei. Hherdder Moxrxi<sup>s</sup> Arbosobo ddei ake hhexr leil guaxr a koxlsseiddo hal mel sael a nga. <sup>3</sup> Yar bir Moxrxi leil middux, hherdder xi zi su ca ddei bir yar zi teixl lei xi zzir leil middux mel sael a nga. <sup>4</sup> Xi cirzzir-hanga leil lei zi su ca ar ddei zza, nael cirza-hanga leil bei teixl lei su ddei mel dder Arbosobo nga a. <sup>5</sup> Moxrxi mel Arbosobo leil visser su a. Yar Arbosobo ddei ake hhexr leil guaxr a koxlsseiddo. Yar halae ca mel leil arddolcar a Arbosobo azo ddar bbeix nia biar gger zaxr.<sup>t</sup> <sup>6</sup> Nael Zidu mel Arbosobo ddei Ssor a. Yar Arbosobo ddei ake hhexr leil guaxr a gielgiel yarzi koxlsseiddo. Niul azo pex dae a lei nr gexr, Arbosobo leil ddarzzi doxr dae a, Zidu niul leil jiuxl loxia arddeirnga a mel, niul dder Arbosobo ddei ake hhexr gga ca nga a.

### **Arbosobo Leil Ddar-nr-zzi Su Mel Wornol Ggie Ddir Wo Nr Ddo**

<sup>7</sup> Yel Arbosobo ddei Xiu ddei bbeix:

“Eilni nia Arbosobo ddei qiurte ddei leil bbejjiur arddeirnga a,  
<sup>8</sup> nia dder no-nr-ni bei nr ddo,  
hherdder nia ddei porpor mel yar leil dir a mipaerbbae gga  
yar leil sixr i hal mel sael a bei nr ddo.<sup>u</sup>

---

<sup>s</sup>**3:2** *Moxrxi* Halcar Moxrxi mel Yirsaexllixl su ca mel ddei vaervaerpor bei beil. Yar Yirsaexllixl su ca mel leil hier dae a Aezixr goxrjia gga ddux lei a, Arbosobo ddei Lixlfaxr mel yaa leil mul gger. Cu'aezixr Sul ber gga biar dae.

<sup>t</sup>**3:5** Moxrxi yaa leil biar gger zaxr ddar mel nei yaa leil mul gger Lixlfaxr mel hherdder Arbosobo arsaе ca mel leil ssoxrsuxl biar dae, arddolcar a ca mel leil jiuxlsu ca ar ddei miardal si lei nia.

<sup>u</sup>**3:8** Ca eil mel hherdder Moxrxi Aezixr goxrjia hier teixl lei mel nga a. Mixrsuxljil Sul nei Semixljil Sul 1-2 leil biar dae.

<sup>9-10</sup> Licei koxl ddei gga,

yaa ngo ddoddomo bei dae hal mel hormo mia a bbeixarnar,  
nael yaa halae zoxlzoxl a ngo leil sixr i,  
ngo arsaе sael ssertexr zza bbe i.

Yel ngo dder ca hal coxr leil sirzzi a bbeix har zaxr a bbeix:  
‘Yaa arddolcar lei ngo dax nr naer, ngo ddei ddar no nr yuex,  
<sup>11</sup> cirse-cirsil lei ngo wornol ggie ddir lei nr ddo!’ ”

eine bbeix a.<sup>v</sup>

<sup>12</sup> Ngo ddei arzzi-nimar arzzi-nimo mel, nia zabbar noni dae, nia  
cirddeir-hanga lei nixmox neix nr ddo, Arbosobo leil ddar-nr-zzi bei nr  
ddo, cirse-cirsil lei gol dae Arbosobo leil i meixl nr gger bei nr ddo.

<sup>13</sup> Nael nia eilni halae zza dae seir leil jiux dae a, nia bbecir-bbeni zzi leil  
quex nia. Eine nga a mel zuixl mel nia leil fur nr var, nia nixmox ddei gex  
nr var.<sup>w</sup> <sup>14</sup> Niul halleix Zidu leil ddarzzi beil car sael a zabbar seilseir a  
yar leil ddarzzi doxr dae arddeirnga a, Zidu ddei cirza-hanga lei niul  
ddei meirne ca dae. <sup>15</sup> Arbosobo Ddei Sul ber leil bbeix:

“Eilni nia Arbosobo ddei qiurte ddei leil bbejjiur arddeirnga a,  
no-nr-ni bei nr ddo,  
hherdder nia ddei porpor mel yar leil dir mel sael a bei nr ddo,”<sup>x</sup>

eine bbeix a.

<sup>16</sup> Arbosobo ddei qiurte ddei leil bbejjiur a lei yar leil dir su ca hal mel  
arseir a neil? Nr nga hherdder Moxrxix Aezixr goxrjia gga hier teixl lei ca

---

<sup>v</sup>**3:11** Sipi Sul 95:7-11 leil vaexr dae.

<sup>w</sup>**3:13** Sipi Sul 95:7-8 leil i ssi.

<sup>x</sup>**3:15** Sipi Sul 95:7 leil vaexr dae.



mel nga a zzarmar? <sup>17</sup> Arbosobo arseir leil licei koxl sirzzi a neil? Nr nga hherdder zuixl bei a mipaerbbae gga si pixl dae ca mel nga a zzarmar? <sup>18</sup> Arbosobo sirzzi a bbeix yaa ngo wornol ggjie ddir lei nr ddo ca hal mel arseir a neil? Nr nga hherdder Arbosobo ddei ddar nr no ca mel nga a zzarmar? <sup>19</sup> Eine nga a niul lei mia a; ca eil mel Arbosobo ddei wornol ggjie ddir wo nr xie a mel, yaa Arbosobo leil ddar-nr-zzi a nga arddeir a.

## 4

### Arbosobo Leil Ddarzzi Su Ca Mel Wornol Ggie Ddir Wo Ddo

<sup>1</sup> Halleix Arbosobo ca leil yar wornol ggjie ddir lol nia bbeix har zaxr dae ho a; eilleix lei niul leil ddir lol nia bbeix dae seir, yel niul Arbosobo leil gexr nia. Nr nga a, niul dder yar wornol ggjie ddir wo nr ddo. <sup>2</sup> Moxrxi hier teixl lei ca hal coxr ddar seirseir mel leil bbejjiur wo a. Niul lei ddar seirseir mel leil bbejjiur wo a. Nael yaa mel bbejjiur a lei ddar-nr-zzi a, ddar seirseir mel dder yaa dax guaxr-nr-zoxr a. <sup>3</sup> Hherdder Arbosobo bbeix goxr mel sael a nga

“Ngo sirzzi du lei a bbeix har zaxr a bbeix,  
yaa arsaebeilei ngo wornol ggjie ddir wo nr ddo,”<sup>y</sup>

eine bbeix a.

Arbosobo merlo-milo cirza-hanga bei har ho a mel, yar miar ddei dder bei jjia a; wornol ggjie ddei lei bei har a; nael yar ddei ddar nr no su mel dder ddir nr wo. Niul ddarzzi a nael yar wornol ggjie ddir wo ddo a.

<sup>4</sup> Arbosobo Ddei Sul ber gga sir ni cir ni leil biar dae a bbeix:

“Sir ni cir ni ci a Arbosobo dder yar bei dae miar cirza-hanga dol dae

---

<sup>y</sup>4:3 Sipi Sul 95:11 leil vaexr dae.

a wornol a.”<sup>z</sup>

<sup>5</sup> Arbosobo Ddei Sul ber gga yoxl kebal ar maex gga bbeix:

“Yaa arsaebeilei ngo wornol ggie ddir wo nr ddo!”<sup>a</sup>

eine bbeix a.

<sup>6</sup> Eine nga a mel ddar no su ca mel lar yar wornol ggie ddir wo ddo. Hoba ddar seirseir mel leil bbejiur su ca mel nael Arbosobo ddei ddar nr no a, yaa dder wornol ggie ddir nr wo.<sup>b</sup> <sup>7</sup> Yel hormo koxl nei goxr ho a, Arbosobo yoxl nixixl ar ni dixl box a<sup>c</sup> Daxlweixl leil bbeix lol a bbeix:

“Eilni nia Arbosobo ddei qiurte ddei leil bbejiur a mel,  
nia dder no-nr-ni bei nr ddo,”<sup>d</sup>

eine bbeix a.

<sup>8</sup> Halleix Yuesuyal ca mel leil Arbosobo ddei wornol ggie ddir lol arddeirnga a, Arbosobo dder kebal wornol nixixl hal ni leil biar nr ssa.

<sup>9-10</sup> Arbosobo ddei wornol ggie ddir su ca mel yaa ddei miar ddei dol dae a wornol a; hherdder Arbosobo yar ddei miar ddei dol dae a wornol mel sael a nga.<sup>e</sup> Arbosobo ddei cassor-worssor mel yar wornol ggie hher wo

---

<sup>z</sup>4:4 Cuaxlsixljil Sul 2:2 leil biar dae.

<sup>a</sup>4:5 Sipi Sul 95:11 leil vaexr dae.

<sup>b</sup>4:6 Ca eil mel mel Moxrxi nei Yuesuyal yaa dax cir coxr a ca hal mel nga a.

<sup>c</sup>4:7 *nixixl ar ni dixl box a* Arbosobo Ddei Sul vaexr beil ber gga yar nixixl ar ni dixl box a nixixl hal ni leil mel “eilni” bbeix.

<sup>d</sup>4:7 Sipi Sul 95:7-8 leil vaexr dae.

<sup>e</sup>4:9-10 Cuaxlsixljil Sul 1:1-2:3 leil biar dae.

ddo. <sup>11</sup> Yel niul dder zabbar seilseir a Arbosobo ddei wornol ggie ddir nia. Nr nga a Arbosobo leil dir su mel sael a, ddir wo nr xie a.

<sup>12</sup> Arbosobo ddei ddar mel gol dae sael a nga, yar arsae bbeix ci a mel dder arsae bei ci. Yar ddei ddar mel bir altor ser nr piar niar mel leil teix leixl, nixmox nei xiu, zixl nei biu bbe kae gger var, halae ca nixmox zzar xiar dae mel hoxr bbeixsael nr hoxr saexl lol var. <sup>13</sup> Arbosobo dax mel azo lei ardoxr kerzi dae nr cexr, cirza-hanga lei Arbosobo meixsaer qier leil mel gorni-gorlael bei dae sael a nga; niul bbeix goxr nei bei goxr maelmaerjia Arbosobo dax bbeix teixl lei nia.

### Yisu Arbosobo Leil Zi Su Vaer Zzir Ddei Nga A

<sup>14</sup> Niul Arbosobo leil zi su vaer zzir ar ddei zza. Yar merlabbor ddeix ho a. Yar mel yarzi ddo, yarzi middux. Yar hherdder Arbosobo ddei Ssor Yisu nga a. Yel niul mel ddarzi mel leil zabbar ddarzzi ze si nia. <sup>15</sup> Niul ddei Arbosobo leil zi su vaer zzir eil ddei mel niul azo lerler bei ci nr xie a yar niul leil zoxlnixr. Yar niul sael a cirza-hanga sixr i dae eil mel pex dae goxr a; nael yar zuixl nr bei. <sup>16</sup> Yel niul dder nixmox vaervaermo Arbosobo ddei baxrde taex dax yar niul leil seir lol ggie ssi nia. Yel yar dder niul leil zoxlnixr cexr, niul leil seirseir meixl gger cexr; eine nga a mel niul arddolcar azo sser zoxr lei yar niul lei beijjiu cexr.

## 5

<sup>1</sup> Moxrxi dax hal coxr cirdae mel Arbosobo leil zi su vaer zzir cirddeir-hanga Lixlweixl<sup>f</sup> ddei giedae su ca mel gga tiur teixl lei lalnga. Arbosobo yaa leil miardal a ca mel ddei dirtu bei a Arbosobo leil miar bei

---

<sup>f</sup>**5:1** *Lixlweixl*/Lixlweixl mel Yargel ddei ssor. Yargel mel ssor ceinirmo zza. Yar giedae ca mel Yirsaexllixl su ca mel nga a. Cu'aezixr Sul 28:1-2 Arbosobo leil zi su vaer zzir mel leil biar dae.

gger. Yaa ca mel ddei zuixl mel leil weix a, Arbosobo leil zzaegu zi nei zzeir seixl zi. <sup>2</sup> Arbosobo leil zi su vaer zzir ddei lei bei coxr var, yel yar Arbosobo ddei ddar mel leil zabbar nr saexl a zuixl bei su ca mel leil zoxlnixr var. <sup>3</sup> Yar dder armael ddei nei ca mel ddei zuixl mel leil weix a, Arbosobo leil zzaegu zi nei zzeir seixl zi nia.<sup>9</sup>

<sup>4</sup> Arseir lei ca mel leil yar leil i du lol niazzir a armael ddei armael Arbosobo leil zi su vaer zzir ddei bei ssi nr cexr. Arbosobo yar leil tiur teixl lei a saelnei Yalluixr<sup>h</sup> sael a Arbosobo leil zi su vaer zzir ddei bei cexr. <sup>5</sup> Ciryoxr a nga, Zidu mel ca mel leil yar leil i du lol niazzir a, armael ddei armael Arbosobo leil zi su vaer zzir ddei bei nr nga, Arbosobo yar leil tiur teixl lei a bei arddeir a. Arbosobo yar leil bbeix:

“Ni mel ngo Ssor a; eilni ngo Niabbor bei a.”<sup>i</sup>

<sup>6</sup> Arbosobo Ddei Sul ber gga yoxl kebal ar maex bbeix:

“Ni mel Maexlzixirdaexr<sup>j</sup> sael a cirse-cirsil lei

---

<sup>9</sup>**5:3** Arbosobo leil zi su mel bbecir-bbeni Arbosobo leil zi. Yaa Arbosobo leil zilabox ngor yoxr gger: 1) Zzeir mel adoxl gga cu ho a Arbosobo leil zi, 2) loxlmoxr zi, 3) zzaso lol qiuxr a zi, 4) zuixl ssoxrsuxl lol a zi, 5) fa nr saexl a zuixl bei a zi. Yirsaexllixl su Arbosobo leil arsae zi, arddolyox zi Lixlweixljil Sul 1–7; 16; 22:17–30 leil biar dae.

<sup>h</sup>**5:4** *Yalluixr* Lixlweixl giedae ca Yalluixr mi hal ddei mel Yirsaexllixl su ca mel gga Arbosobo leil zi su vaer zzir bei beil hal ddei a. Yel hane cirdae mel Arbosobo leil zi su mel mel yar ddei giedae ca gga tiur teixl lei nia. Yalluixr arsae Arbosobo leil zi su vaer zzir ddei bei mel Cu'aezixr Sul 28:1–2 nei Lixlweixljil Sul 8, 9 leil biar dae.

<sup>i</sup>**5:5** Sipi Sul 2:7 leil vaexr dae.

ngo leil zi su bei a,<sup>k</sup>

eine bbeix a.

<sup>7</sup> Yisu middurbbor hher dae car, meixbbix ddux dae a worcixl-worni nge dae a, yar leil nr si lol jiuxl bbesur zza Arbosobo dax ddar biar. Yar Arbosobo ddei ddar no a, Arbosobo dder yar ddar biar dae mel leil noni a. <sup>8</sup> Yisu mel Arbosobo ddei Ssor a bbeixarnar, nael yar goxrsol-goxrnaxr mel goxr a, arsaе Arbosobo ddei ddar no nia zza wo a. <sup>9</sup> Yar seirceix-seirmaer loxr a, yel yar dder cirse-cirsil lei yar ddei ddar no su ca mel leil jiuxl cexr Seirpor ddei loxr a. <sup>10</sup> Halae Arbosobo yar leil tiur a, Maexlzixirdaexr sael a Arbosobo leil zi su vaer zzir ddei loxr lol a.

### Ddar-nr-zzi Bei Nr Ddo

<sup>11</sup> Yisu Maexlzixirdaexr sael a Arbosobo leil zi su vaer zzir ddei bei, eil ddei leil bbeix ci a mel, ngua halae nia leil ddar cirke biar gger ddu zza seir, nael nia mel noni dil nr ddo, yel nia leil yarzi biar gger sol. <sup>12</sup> Nia mel Yisu leil hormo nixixl ddarzzi ho a, nia kebal ca ddei sulmulsu beilabox nga a; nael kebal ca mel halae nia leil Arbosobo ddei ddar noni wo so zzir hal mel mul gger nia. Nia baxr dda nia, almeixr zzor nr var seir hal mel sael a nga. <sup>13</sup> Baxr lar dda var su mel mel dder anix bexlelte a nga, yel yaa arddol mel hoxr arddol mel nr hoxr bbe kae nr var. <sup>14</sup> Nael almeixr zzor var su ca vaer mel mel ho bei ho Arbosobo ddei ddar noni wo sol hal mel saexl, yel arddol mel hoxr arddol mel nr hoxr bbe kae var.

---

<sup>j</sup>**5:6** *Maexlzixirdaexr* Maexlzixirdaexr mel Yalboxrlahar dax cir coxr su ca a. Yar Arbosobo leil zi su bei, nael yar Lixlweixl giedae ca nr nga. Yar leil Cuaxlsixljil Sul 14:17-20 nei Xiboxrlaexr Sul 7 leil biar dae.

<sup>k</sup>**5:6** Sipi Sul 110:4 leil vaexr dae.

## 6

<sup>1-2</sup> Yel niul mel Zidu leil ddarzzi a, noni wo so ddar eil mel leil lar biar doxr dae nr ddo. Bir dae a bbeix: ca mel arsaе armael ddei zuixl mel cexrssexl nia, huixrsoxr nia, Arbosobo leil ddarzzi nia, arsaе sexlsir, leixrhher ddei si leil ta gex dae a Arbosobo dax ddar biar gger, ca si ho a gol du xixl lei, Arbosobo cirse-cirsil lei zuixl zza ca mel leil faxr nia, eilzzu leil lar biar doxr dae nr ddo, ho bei ho ddar noni wo sol hal mel lei saexl dax nia. <sup>3</sup> Arbosobo niul leil bei lol arddeirnga a mel, niul dder eine bei nia.

<sup>4</sup> Ca cirmelmel a Arbosobo leil saexl ho a; yaa Arbosobo ddei seirseir mel li wo ho a; Arbosobo ddei Xiu ddei lei yaa nixmox zzar hher ji dae ho a; <sup>5</sup> Arbosobo ddei ddar mel yarzi seir yaa saexl ho a; yaa ca mel ddoddomo bei dae mel leil mia ho a; hherdder Arbosobo jjixr lei halcar yar lar bei var hal mel nga a. <sup>6</sup> Nael yaa yoxl Yisu leil zeixleixr ddar-nr-zzi ssi du si arddeirnga a mel, arsaеbeilei arseir lei ca eil mel leil zeixleixr huixrsoxr lol nr cexr a. Yaa eine bei a mel hherdder Arbosobo ddei Ssor ddei leil zeixleixr sixrzixljiaxl leil diexr ngexl gger sael a nga, daxmeix yar leil bei vuxryixr.

<sup>7</sup> Bir dae a bbeix mi ar bbae gga zoxlzoxl a lei almer lei ji dae, yel mi gga loxlmoxr yarzi naxrcixl ner teixl lei arddeirnga a mel, mi paxr su ddei dax lei yarzi seir. Arbosobo dder mi bbae leil seir lol a. <sup>1 8</sup> Nael mi gga alcur nei silbbar lar ner teixl lei arddeirnga a mel, mi paxr su ddei dder baexr a paxr dae lalnga, Arbosobo dder mi eil bbae leil faxr, halae adoxl sser a cu pixl gger var.<sup>m</sup>

<sup>9</sup> Ngo perniar dae arzzi-nimar arzzi-nimo mel, ngo ddar eil yox

---

<sup>l</sup>6:7 Ddar eil qier Arbosobo leil ddarzzi su ca mel leil biar.

<sup>m</sup>6:8 Ddar eil qier Arbosobo leil ddar-nr-zzi su ca mel leil biar.

bbeixarnar, nael nia bir dder-nr-zzi su ca mel leil bei seir leixl mel ngo saexl. Nia bei dae mel hherdder Arbosobo jiuxl wo ddo ca mel bei dae mel nga a. <sup>10</sup> Arbosobo mel bbaehhex, nia yar leil miar bei gger yar leil perniar a cirleixr nr nor yar ddei cassor-worssor mel leil beijjiu yar holcir dae. <sup>11</sup> Ngua nia cirddeir-hanga lei zabbar seilseir a eil mel sael a bei doxr dae loxia, si lo ci zzezze bei ci, yel nia li wo loxia dae mel li wo lol. <sup>12</sup> Nia noni dil nr ddo bei nr ddo, Arbosobo leil ddarzzi nei ssertexr zza su hal mel dax bei zza nia. Yaa Arbosobo yaa leil gger bbeix har zaxr goxr mel li wo ddo.

### **Arbosobo Arsae Bbeix A Mel Dder Arsae Nga**

<sup>13</sup> Halleix Arbosobo Yalboxrlahar leil seir lol bbeix har zaxr car, bir armael leil vaer leixl ar ddei nr zza a; yel Arbosobo dder armael ddei mi ddei bbeix dae a bbeix:

<sup>14</sup> “Ngo arsaebeilei ni leil seir lol nia,  
ni giedae ca mel hhe lei hhe jjia nr ddo miur lol nia,”<sup>n</sup>

eine bbeix a.

<sup>15</sup> Yel Yalboxrlahar dder Arbosobo leil ddarzzi a xia doxr dae a, Arbosobo yar leil gger nia bbeix har zaxr goxr mel li wo a.

<sup>16</sup> Ca mel ddarzi bbeix a mel bir armael leil vaer leixl hal mel leil dor dae a bbeix. Eine bbeix ho a mel arsaebeilei bei nia, yel ca mel dder zzicarzzi dax nr zex. <sup>17</sup> Ciryoxr a nga, Arbosobo mel yar bbeix har zaxr goxr mel li wo ddo ca hal mel leil yar dixl har dae eil mel mel gierbox

---

<sup>n</sup>**6:14** Cuaxlsixljil Sul 22:17 leil vaexr dae. Arbosobo Yalboxrlahar leil seir lol bbeix har zaxr dder eil mel mel Cuaxlsixljil Sul 12:2-3; 15:18; 17:2-19; 22:16-18 leil biar dae.

nixixl nr zza saexl lol, yel yar dder faxrsixl. <sup>18</sup> Arbosobo eine bei a, yel niul yar dax pahher ssi a yar bbeix har zaxr goxr faxrsixl goxr mel leil li wo loxia a mel, yar niul leil nixmox dder vaer var. Yar ca nr fur lei, yel yar bbeix har zaxr goxr nei yar faxrsixl goxr eil nr yoxr mel gierbox nixixl nr zza. <sup>19</sup> Niul nixmox ddei vever a Yisu leil ddarzzi, eine nga a mel niul dder Arbosobo ddei xi lavulzzar giex gga ddir ci ddo a. <sup>20</sup> Yisu niul leil weix a hoba halmaex gga ddir ci ho a. Yar mel Maexlzixirdaexr dax zox dae a cirse-cirsil lei Arbosobo leil zi su vaer zzir ddei bei a.

## 7

### Maexlzixirdaexr Arbosobo Leil Zi Su Ca Ar Ddei A

<sup>1</sup> Maexlzixirdaexr mel Saler zzi hal ddei ddei zzirmar a; yar lei Arbosobo leil zi su ar ddei a. Arbosobo mel merlo-milo bei su ddei nga a. Yalboxrlahar zzirmar cirke leil deil leixl gger a, yar jjixr lei halcar, Maexlzixirdaexr yar leil mia a yar leil seir lol. <sup>p 2</sup> Yalboxrlahar dder yar zaxlddaexr wo zzaegu mel cei fel gga yar leil ar fel bbe gger a. Maexlzixirdaexr ddei yilsi mel dder: “Nixmox seir gaxzi zzirmar.” Yar leil yoxl Saler zzirmar lei ae; Saler ddei yilsi mel dder: “Ca leil nixmox zzaso lol.” <sup>3</sup> Yar arbbor nr zza, ama nr zza, porpor lei nr zza. Yar arddol

---

<sup>o6:19</sup> Yisu nr si seir mel Arbosobo leil zi su vaer zzir ddei larnei Arbosobo ddei xi lavulzzar giex gga ddir ddo. Yisu si ho a, Yisu leil ddarzzi su mel yaa ddei yaa Arbosobo dax ddar biar cexr hherdder Arbosobo ddei xi lavulzzar giex gga ddir cexr sael a nga. Xiboxrlaexr Sul 9 leil i cexr.

<sup>p7:1</sup> Cuaxlsixljil Sul 14:17-20 Maexlzixirdaexr nei Yalboxrlahar leil biar dae.



cir ni xiu arddol cir ni si lei nr zza.<sup>9</sup> Yar Arbosobo ddei Ssor ddei lesel, cirse-cirsil lei Arbosobo leil zi su bei.

<sup>4</sup> Yirsaexllixl su ca ddei porpor Yalboxrlahar lei zaxlddaexr a ddaexr wo mel cei fel ddei gga Maexlzixirdaexr leil ar fel gger. Ca mel Maexlzixirdaexr leil arsae sael i du nia arleixr xiar. <sup>5</sup> Lixlfaxr dax zox dae a mel, Lixlweixl giedae ca Arbosobo leil zi su ca mel lar nei kebal Yirsaexllixl su ca mel dax cei fel gga ar fel li wo mibbe. Yirsaexllixl su ca mel Yalboxrlahar giedae ca a bbeixarnar, yaa eine bei a mel bei mibbe arddeir a. <sup>5</sup> <sup>6</sup> Maexlzixirdaexr mel Lixlweixl giedae ca nr nga, nael yar halae Yalboxrlahar dax cei fel ddei gga ar fel li wo a. Yar yoxl Yalboxrlahar leil seir lol. Yalboxrlahar mel Arbosobo yar leil seir lol nia bbeix har zaxr goxr ca ddei nga a. <sup>7</sup> Arseir lei saexl, dixlweixl vaer su mel dixlweixl ye su mel leil seir lol. <sup>8</sup> Arbosobo leil zi su mel mel cei fel ddei gga ar fel li wo su ca mel nga a. Lixlweixl giedae ca Arbosobo leil zi su mel zzael si var, Maexlzixirdaexr zzael gol doxr dae. <sup>9-10</sup> Yalboxrlahar zaxlddaexr xixl lei a, Maexlzixirdaexr yar leil zi ssi car, Lixlweixl leil xiu nr teixl lei seir bbeixarnar, nael niul yar Yalboxrlahar ggecir ddei gga hher ji dae ho a bbeix cexr, yel Yalboxrlahar Maexlzixirdaexr leil cei fel ddei gga ar fel gger a mel Lixlweixl lei yar leil gger dae sael a nga.<sup>t</sup>

---

<sup>9</sup>7:3 *Yar arbbor nr zza, ama nr zza, porpor lei nr zza. Yar arddol cir ni xiu arddol cir ni si lei nr zza. Cuaxlsixljil Sul 14 Maexlzixirdaexr ddei arbbor, ama, porpor arseir a nr biar; yar arddolcar xiu arddolcar si eil mel lei nr biar.*

<sup>5</sup>7:5 Yalboxrlahar ddei lilbol mel Yargel. Yargel giedae ca mel Yirsaexllixl su ca mel nga a. Yargel ssor ceinirmo zza. Lixlweixl mel yar ssor mel gga ar ddei a. Yar giedae ca Arbosobo leil zi su bei, yel Lixlweixl kebal arzzi-nimar ceidilmo yar leil cei fel gga ar fel gger mibbe.

<sup>t</sup>7:9-10 Maexlzixirdaexr Yalboxrlahar dax cei fel gga ar fel li wo a mel

## Yisu Maexlzixirdaexr Sael A Arbosobo Leil Zi Su Bei

<sup>11-12</sup> Lixlfaxr dax zox dae a Lixlweixl giedae ca mel Arbosobo leil zi su bei. Nael yaa bei dae mel ca leil seirceix-seirmaer loxr lol var arddeirnga a mel, Arbosobo dder kebal yar leil zi su ca ar yoxr ddux lei lol nr ssa. Nael Arbosobo Maexlzixirdaexr dax zox dae a ca ar ddei leil yar leil zi su loxr lol. Yar eine bei a mel yar leil zi su ddei gierbox a, yel Lixlfaxr ddei lei gierbox nia. Ca eil ddei mel Lixlweixl giedae ca nr nga. <sup>13-14</sup> Yar mel niul ddei Seirpor Yisu ddei nga a. Arseir lei saexl, yar Yoxrdaxl giedae ca. Yar dax ciryoxr nga ca hal cuxr gga mel Arbosobo leil zi su ca ddux lei nr seix. Moxrxi Arbosobo leil zi su mel leil biar car a lei, Lixlweixl ddei cuxr leil lar biar, Yoxrdaxl ddei cuxr leil biar nr goxr. <sup>15-17</sup> Nael Arbosobo Ddei Sul ber leil vaexr dae a bbeix:

“Ni mel Maexlzixirdaexr sael a cirse-cirsil lei ngo leil zi su bei a.”<sup>u</sup>

Yel Maexlzixirdaexr dax zox dae a kebal Arbosobo leil zi su ar ddei ddux lei a. Yar Arbosobo leil zi su bei a mel Lixlweixl giedae ca nga a bei nr nga, yar cirse-cirsil gol dae quexrlixl zza a nga arddeir a. Yel nia dder eil ddei mel yarzi a saexl ddo a.

<sup>18-19</sup> Halleix Moxrxi vaexr dae Lixlfaxr mel ca leil beijjiu guaxr-nr-zoxr, ca leil seirceix-seirmaer loxr lol nr var, yel dder Lixlfaxr hal ddei bei pixl gger. Nael niul Yisu Zidu leil niul leil beijjiu loxia a mel, niul dder Arbosobo dax naer xixl lei cexr.

<sup>20</sup> Arbosobo faxrsixl a Yisu leil Arbosobo leil zi su bei lol; nael kebal ca mel leil Arbosobo leil zi su bei lol car a mel Arbosobo faxrsixl nr goxr.

---

yilsi mel dder bbeix, yar bir Lixlweixl giedae ca Arbosobo leil zi su leil vaer leixl.

<sup>u</sup>7:15-17 Sipi Sul 110:4 leil vaexr goxr.

<sup>21</sup> Yisu leil larnei Arbosobo faxrsixl a yar leil bei lol: Arbosobo yar leil bbeix:

“Ngo faxrsixl goxr a, ngo xiar har goxr mel gierbox nixixl nr zza:  
Ni mel cirse-cirsil lei ngo leil zi su bei nia,”<sup>v</sup>

eine bbeix a.

<sup>22</sup> Arbosobo eine faxrsixl a, Yisu yar leil zi su bei bbeix har zaxr dae eil ddei mel bir Lixlweixl giedae ca mel yar leil zi su bei bbeix har zaxr goxr hal ddei leil seir leixl.<sup>w x</sup>

<sup>23</sup> Halleix Arbosobo leil zi su mel mel cirke zza. Yaa si var, yel kebal ca mel yaa dirtu bei nia. <sup>24</sup> Nael Yisu mel cirse-cirsil gol dae; yar cirse-cirsil lei Arbosobo leil zi su bei doxr dae cexr, arseir lei yar dirtu bei lei nr ssa.

<sup>25</sup> Yisu cirse-cirsil lei gol dae a, ca mel leil Arbosobo dax qiuxr gger doxr dae a, yel yar leil koxl dae a Arbosobo dax lei su ca mel, yar dder yaa leil jiuxl gaxzi a.

<sup>26</sup> Eine nga a, Yisu mel hherdder niul leil cirza-hanga beijjiu a Arbosobo leil zi su vaer zzir ddei nga a. Yar mel seirceix-seirmaer, botaddu nr zza, nixmox ddei lei seir gaxzi. Yar kebal ca mel sael a zuixl nr bei. Arbosobo yar leil merlabbor ddeix lol a merlabbor hher dae hazza-hamaer leil lei vaer leixl lol. <sup>27</sup> Yar kebal Arbosobo leil zi su hal mel le-nr-sel. Hal mel mel bbecir-bbeni lei hoba armael ddei zuixl mel leil weix a Arbosobo leil

---

<sup>v</sup>7:21 Sipi Sul 110:4 leil vaexr goxr.

<sup>w</sup>7:22 Eine nga a Yisu niul leil seirseir mel li wo lol a bir Arbosobo Yirsaexllixl su ca mel leil seirseir mel li wo lol leil seir leixl.

<sup>x</sup>7:22 Lixlweixl giedae ca mel yar leil zi su bei bbeix har zaxr goxr hal ddei leil Cu'aezixr Sul 20 cirdae a maelele zzezze lei biar dae. Lixlweixljil Sul leil lei biar dae.

zi ho a saelnei cassor-worssor ddei zuixl mel leil weix a Arbosobo leil zi cexr. Nael Yisu mel armael leil weix a Arbosobo leil zi nr ssa. Yar ca mel leil weix a armael ca ddei Arbosobo leil cir boxl lar zi lei, yar dder ca maelmaerjia ddei zuixl mel leil ssoxrsuxl lol a. <sup>28</sup> Moxrxi ddei Lixlfaxr dax zox dae a mel, azo lerler bei ci nr xie zza ca mel leil lei Arbosobo leil zi su vaer zzir ddei bei lol. Nael Lixlfaxr zza ho a, Arbosobo faxrsixl a yar Ssor ddei leil tiur a yar leil zi su vaer zzir ddei bei lol. Yar Ssor ddei mel cirse-cirsil lei seirceix-seirmaer ddei nga a.

## 8

### Yisu Mel Arbosobo Leil Zi Su Vaer Zzir Ddei A

<sup>1</sup> Niul biar dae zoxlyoxlyoxl mel hherdder eil mel nga a: niul Arbosobo leil zi su vaer zzir ar ddei zza. Yar mel Yisu a. Yar merlabbor gga, cirza-hanga ddo zzir Arbosobo ddei baxrde yo piar a gga cux dae. <sup>2</sup> Yar merlabbor gga Arbosobo ddei xi hherdder seirceix-seirmaer Sexlmuxl giex gga hher dae a, Arbosobo leil visser dae. Xi eil giex mel ca zi teixl lei nr nga, Seirpor zi teixl lei Sexlmuxl yarzi giex nga a.

<sup>3</sup> Ha arseir leil tiur teixl lei a Arbosobo leil zi su vaer zzir ddei bei lol a mel, hherdder ca mel leil weix a Arbosobo leil zzaegu gger lol nei Arbosobo leil zzeir seixl zi lol arddeir a. Yel Arbosobo leil zi su vaer zzir Yisu lei Arbosobo leil zilabox zi nia, hherdder yar armael ca ddei Arbosobo leil zi. <sup>4</sup> Lixlfaxr dax zox dae a middurbbor Arbosobo ddei xi gga mel Arbosobo leil zilabox gger su ca zza ho a; yel Yisu middurbbor Arbosobo leil zi su bei nr ssa. <sup>5</sup> Middurbbor Arbosobo ddei xi giex mel merlabbor Arbosobo ddei xi giex dax zox dae a zi. Yel Moxrxi middurbbor ddei Sexlmuxl<sup>y</sup> giex zi car, Arbosobo yar leil bbeix a bbeix:

---

<sup>y</sup>8:5 *middurbbor ddei Sexlmuxl*/Cu'aezixr Sul 25–27, 35–40 middurbbor

“Ni fa dae nia, maelmaerjjia lei ni worga leil hher dae a ngo ni leil mia lol mel dax zox dae a zi nia.”<sup>6</sup> Nael eilboxl Yisu Arbosobo leil zi su vaer zzir ddei bei a mel bixr Lixlweixl giedae ca mel Arbosobo leil zi su vaer zzir bei leil hormo seir leixl. Yisu mel Arbosobo nei ca mel aga ca ddei nga a. Yel eilleix Arbosobo ca mel dax bbeix har zaxr dae mel lei bir halleix leil seir leixl mel sael a nga. Eil ddei mel dder Yisu bei dae mel nga a.<sup>z</sup>

<sup>7</sup> Halleix Yirsaexllixl su ca mel dax bbeix har zaxr goxr hal ddei botaddu nr zza arddeirnga a mel, zeixleixr ar boxl bbeix har zaxr box nr ssa a. <sup>8</sup> Nael Arbosobo yar ddei cassor-worssor mel leil bota a bbeix:

“Nixixl ddei ci niazir dae a;

ngo Yirsaexllixl su cassor-worssor nei Yoxrdaxl su cassor-worssor  
mel dax

zeixleixr ar boxl bbeix har zaxr box nia.

<sup>9</sup> Ngo zeixleixr bbeix har zaxr box eil ddei mel

halleix yaa porpor mel dax bbeix har zaxr goxr hal ddei le-nr-sel.

Halleix ngo zzael yaa leixrhher ddei leil gga dae a

yaa leil Aezixr goxrjia gga hier teixl lei a.

Nael yaa zzael ngo yaa dax bbeix har zaxr goxr ddei dax bei nr mae,

yel ngo dder yaa leil nr guaxr.

<sup>10</sup> Nixixl hal mel goxr ho a, ngo Yirsaexllixl su cassor-worssor mel dax

---

ddei Sexlmuxl leil biar dae.

<sup>z</sup>**8:6** Yisu si xilmeir leil dder Arbosobo ca mel dax bbeix har zaxr goxr a. Yar Yalda, Noxryal, Yalboxrlahar, Moxrxi nei Daxlweixl yaa cirddeir-hanga dax lei bbeix har zaxr goxr a. Yisu si ho a Arbosobo zeixleixr ca mel dax bbeix har zaxr. Giedae yar ca mel dax bbeix har zaxr yarsixl ddei bir xilmeir yar ca mel dax bbeix har zaxr yarli ddei leil seir.

zeixleixr bbeix har zaxr box a mel eine bei nia:  
ngo, ngo ddei Lixlfaxr mel yaa olggar zzar hher ji dae lol nia,  
yaa nixmox gga hher ji dae lol nia,  
ngo yaa ddei Arbosobo bei nia,  
yaa ngo ddei cassor-worssor bei nia.

<sup>11</sup> Hane ci a mel ca ye zzir ddei cirdae a vaer zzir ddei zzezze  
maelmaerjia lei ngo leil saexl ho a;  
yel yaa dder zeixleixr yaa dax cir mermi su ca mel leil nei yar  
arzzi-nimar mel leil,  
Arbosobo leil saexl nia, mul gger nr ssa a.

<sup>12</sup> Ngo yaa bei cox goxr mel leil vuxr-nr-yixr a;  
yaa zuixl mel leil ngo zeixleixr hol-nr-cir a.”<sup>a</sup>

Seirpor eine bbeix a.

<sup>13</sup> Arbosobo bbeix yar zeixleixr yarsixl ar ddei bbeix har zaxr box nia  
eine bbeix a. Yel halleix bbeix har zaxr goxr hal ddei mel guaxr-nr-zoxr,  
sser ggje lei nr zza, hormo arleixr nr nga dder mier a.

## 9

### Middurbbor Arbosobo Ddei Xi

<sup>1</sup> Halleix bbeix har zaxr goxr hal ddei mel Arbosobo leil arsae zi nia  
leiddur armel zza, halae middurbbor lei Arbosobo ddei xi zza.

<sup>2-3</sup> Arbosobo ddei xi mel dder Sexlmuxl nga a. Sexlmuxl mel nr giex bbe  
mal, agala gga mel mae ar co giex gex dae. Lamaebbaer mel de doxl ji  
dae, halae Arbosobo leil zilabox aba dol deixddu zaezir ar zoxr zza. Xi  
eil giex mel seirceix-seirmaer ar giex a. Lavulzzar mel zeixleixr ar giex

---

<sup>a</sup>8:12 Yilixlmir Sul 31:31-34 leil vaexr dae.

zza. Hal giex mel seirceix-seirmaer gaxzi giex nga a. <sup>4</sup> Lavulzzar giex gga mel sae bei teixl lei hexzzi doxldeixddu ar ddei dol dae, sae ba gex du lei bbezzir ar ddei zza. Bbezzir gga mel marnaxr ji dae sae bei teixl lei bbie ar taex zza nei Yalluixr ddei zzargger seixlpeixl niar goxr caex ji dae, halae legelbbe nr pir dol ji dae. Hal nr pir leil mel Arbosobo miardal dae Lixlfixr hal cei tiuxr vaexr deix dae.<sup>b</sup> <sup>5</sup> Bbezzir ggabilddu ddei leil mel sae bei teixl lei jiluxlboxr<sup>c</sup> nnel niar gex dae. Yaa mel Arbosobo sael a bbobbolbbo zza. Yaa ddoleixr ddei ddaexr kae dae.<sup>d</sup> Halmaex mel Arbosobo ca mel ddei zuixl ssoxrsuxl ggje a. Eilcar ngo eil mel maelmaerjia nia leil zabbar seirseir a biar gger nr cexr.<sup>e</sup>

<sup>6</sup> Cirza-hanga zzaegu mel eine dol ji dae ho a, Arbosobo leil zi su mel dder bbecir-bbeni lei Sexlmuxl lamaebbaer giex gga Arbosobo leil zi.

<sup>7</sup> Nael Arbosobo leil zi su vaer zzir ddei larnei Sexlmuxl lavulzzar giex gga ddir cexr, halae cir koxl a lei cir boxl lar ddir cexr. Yar cirboxl-hanga ddir a lei zzeir ddei sirnilni vei dae a yar ddei zuixl nei

---

<sup>b</sup>9:4 Hal cei tiuxr arddolyox a mel Cu'aezixr Sul 20 nei Semixljil Sul 5 leil biar dae.

<sup>c</sup>9:5 *jiluxlboxr* Jiluxlboxr mel dder Arbosobo dax mae doxr dae a, Arbosobo leil bbeix zae gger su mel nga a. Jiluxlboxr mel qiaxrmeix liller zza: cirddeir a nael ca lesel, cirddeir a nael hhemar lesel, cirddeir a nael niur lesel, cirddeir a nael zzemar lesel. Yaa lei ddoleixr niar dae. Yaa ddei qihher ca ddei qihher lesel, nael cini mel niur ddei lesel. Yaa ddoleixr woxrke lei leixrhher zza. Yaa leil i dae a mel adoxl le lesel. Cuaxlsixljil Sul 3:24, Yirsijiexr Sul 1, nei Qirsixlluxl Sul 4:6-11 leil biar dae.

<sup>d</sup>9:5 Bbezzir ddei leil jiluxlboxr niar dae a mel hherdder Arbosobo ddei baxrde taex merlabbor zza dae sael a nga.

<sup>e</sup>9:5 Cu'aezixr Sul 25-27 nei 30 leil Sexlmuxl leil biar dae.

cassor-worssor mel nr saexl a bei dae zuixl mel leil weix a Arbosobo leil zi.<sup>f 8</sup> Sexlmuxl giex zza dae seir hozze mel ca mel dder Sexlmuxl gga lavulzzar seirceix-seirmaer gaxzi giex gga ddir nr cexr, Arbosobo ddei Xiu ddei mel cirza-hanga leiddur eil mel sser dae a niul leil saexl lol.<sup>9</sup> Ca mel Arbosobo leil cirza-hanga gger nei yar leil zzeir seixl zi a lei, yaa nixmox ddei leil seirceix-seirmaer loxr lol nr var.<sup>10</sup> Halleix ddei leiddur mel mel ca leil azo zzor, azo dda, arsae ggecir seibeix lol mul gger lalnga, nixmox zzar guaxr-nr-zoxr, hherdder Arbosobo leiddur yarsixl lael box hal cir ni zzezze lar guaxrzoxr ci.<sup>9</sup>

### Yisu Zidu Ddei Sirnilni

<sup>11</sup> Nael eilboxl Zidu mel Arbosobo leil zi su vaer zzir ddei bei lei a. Yar bei dae mel niul leil yarzi sael seir lol. Yar merlabbor gga ddir Sexlmuxl hal giex mel bir middurbbor hal giex leil vaer leixl nei seirceix-seirmaer leixl. Sexlmuxl hal giex mel ca zi du lei nr nga, middurbbor zi dol dae nr nga.<sup>12</sup> Zidu acixl nei niurssor ddei sirnilni sser a Arbosobo leil zi nr nga, yar armael ddei sirnilni sser a Arbosobo leil zi, yel yar merlabbor Sexlmuxl lavulzzar seirceix-seirmaer gaxzi hal giex gga cir boxl a ddir dder cirse-cirsil lei ca ddei zuixl mel bei pixl gger a yaa leil jiuxl teixl lei a.<sup>13</sup> Lixlfaxr dax zox dae a mel acixl nei niur ddei sirnilni halae niurbol cu pixl ho a kurlu mel sei-nr-beix su ca mel leil xiu deix gger, yel yaa leil seibeix lol.<sup>h 14</sup> Zidu ddei sirnilni mel gielgiel ca mel leil seibeix lol cexr.

---

<sup>f</sup>9:7 Lixlweixljil Sul 16 leil biar dae.

<sup>9</sup>9:10 Arbosobo leiddur yarsixl lael box hal cir ni mel hherdder Yisu gol du xixl lei a merlabbor Arbosobo ddei xi gga ddir a armael ddei sirnilni sser a yar leil zi cir ni nga a.

<sup>h</sup>9:13 Arbosobo ddei Lixlfaxr mel dax bei mae su mel seibeix; bei nr mae su mel dder sei-nr-beix. Bir dae a bbeix Lixlfaxr leil miardal dae



Yar cirse-cirsil lei gol dae Arbosobo ddei Xiu ddei leil koxl dae a armael ddei seirceix-seirmaer ca ddei Arbosobo leil zi a, niul nixmox ddei leil cir xia gger, niul nr seir bei dae mel bei pixl gger, yel niul leil gol dae Arbosobo leil visser cexr lol.

<sup>15</sup> Eine nga a Zidu mel hherdder Arbosobo nei ca mel aga ca ddei nga a. Eilleix Arbosobo Zidu leil sser dae a, yar tiur teixl lei ca hazza leil yar yaa leil gger nia bbeix har zaxr goxr mel li wo lol. Yar gger eil mel mel cirse-cirsil zza doxr dae. Yisu si a, Arbosobo Moxrxi dax bbeix har zaxr halleix, Lixlfaxr no-nr-ni a zuixl bei su ca hal mel leil lei jiuxl xixl lei a.

<sup>16-17</sup> Bir dae a bbeix: ca mel nr si seir dder armael ddei cirza-hanga arseir leil gger nia vaexr har zaxr dae a. Nael yar nr si ho zze mel li wo su ca hal ddei dder li wo nr ddo. Ca eil ddei yarzi si ho a saelnei li wo ddo. <sup>18</sup> Ciryoxr a nga, halleix Arbosobo Yirsaexllixl su ca mel dax bbeix har zaxr goxr hal ddei lei zzeir nr seixl sirnilni nr ddux a mel dder bei nr cexr. <sup>19</sup> Moxrxi Yirsaexllixl su ca mel leil Arbosobo Lixlfaxr gga miardal dae ciryoxr-hanga bbeix gger ho a, yar yame bei teixl lei maebbiur nilni nei silbbar lesel ar bo sser a, niurssor nei acixl ddei sirnilni gga halae ajjix gga niuxl a, Lixlfaxr sul jur gex dae mel leil nei ca maelmaerjjia leil veil deix gger a. <sup>20</sup> Yar bbeix: “Sirnilni eil ddei hherdder Arbosobo nia dax bbeix har zaxr dae hoxltexr ddei nga a; yar nia leil miardal dae mel nia bei mae dae nia.”<sup>i</sup> <sup>21</sup> Moxrxi halae Sexlmuxl giex leil nei Arbosobo leil zi a sser dae zzaegu hazza leil lei sirnilni veil deix gger a. <sup>22</sup> Lixlfaxr gga bbeix, maelmaerjjia leil lei sirnilni sser a seibeix lol nia, sirnilni nr ddux a

---

zzor nr ddo mel zzor, ca sima leil ta a mel sei-nr-beix. Ggecirzza ssormaer nei xiu mu su ssormaer mel lei sei-nr-beix. Arsae bei a seibeix, arsae bei a sei-nr-beix Lixlweixljil Sul 11-18 nei Mixrsuxljil Sul 19 leil biar dae.

<sup>i</sup>9:20 Cu'aezixr Sul 24:8 leil vaexr dae.

mel zuixl mel leil dder ssoxrsuxl nr cexr.<sup>j</sup>

<sup>23</sup> Middurbbor Arbosobo leil zi a sserddu zzaegu mel mel merlabbor ddei yoxryaxl mel dax zox dae a bei teixl lei. Middurbbor Sexlmuxl gga ddei zzaegu mel leil zilabox mel ddei sirnilni sser a eine seibeix lol nia. Nael merlabbor Sexlmuxl gga ddei zzaegu mel leil gielgiel zilabox yarzi naxrcixl ddei sirnilni sser a seibeix lol nia. <sup>24</sup> Zidu mel ca mel zi teixl lei Arbosobo ddei xi seirceix-seirmaer giex gga nr ddir. Hal giex mel merlabbor ddei yoxryaxl ddei dax zox dae a zi teixl lei lalnga. Yar merlabbor yarzi Arbosobo ddei xi giex gga ddir a. Eilleix niul leil weix a, Arbosobo meixsaer qier leil hher dae. <sup>25</sup> Arbosobo leil zi su vaer zzir ddei mel bbecir-bbekoxl lei acixl nei niur ddei sirnilni vei dae a, Arbosobo ddei xi lavulzzar seirceix-seirmaer gaxzi giex gga ddir a, Arbosobo leil zi. Nael Zidu mel armael ca ddei sser a Arbosobo leil hormo boxl nei zi nr ssa. <sup>26</sup> Yar hormo boxl nei zi nia arddeirnga a, Arbosobo cirza-hanga coxl cirdae a eilleix ci a mel, yar dder hormo boxl nei goxr sol ho a. Nael eilleix nixixl maelele ddei gga ci a, yar armael ggecir ddei Arbosobo leil cir boxl zi ho a dder zuixl mel ssoxrsuxl cexr a. <sup>27</sup> Ca cirddeir-hanga lei ar boxl si nia, si ho a Arbosobo yaa leil serpaxl. <sup>28</sup> Eine nga a Zidu mel armael ggecir ddei Arbosobo leil cir boxl zi a dder ca cirke ddei zuixl ssoxrsuxl ho a. Arddolcar a yar halae zeixleixr ar boxl jjixr lei nia seir, nael halboxl mel ca ddei zuixl mel leil ssoxrsuxl lei nr nga a nei, yar leil xia dae su ca hal mel leil jiuxl lei arddeir a.

---

<sup>j</sup>9:22 *Lixlfaxr gga bbeix, maelmaerjia leil lei sirnilni sser a seibeix lol nia, sirnilni nr ddux a mel zuixl mel leil dder ssoxrsuxl nr cexr*

Yirsaexllixl su yarzi sol ca hal mel mel zzeir nr zza a Arbosobo yaa leil some sser lol a yar leil zi lol. Yaa sirnilni nr ddux bbeixarnar, Arbosobo yaa leil ssoxrsuxl. Lixlweixljil Sul 5:11 leil biar dae.

# 10

<sup>1</sup> Lixlfaxr ddei mel seir zzir hal ddei nr nga; yar mel arddolcar a seir zzir hal mel ddei avix sael a nga. Yel Lixlfaxr dax bei mae dae a bbecir-bbekoxl lei Arbosobo leil ciryoxr a zi doxr a mel, Arbosobo leil zi lei su ca mel leil seirceix-seirmaer loxr lol nr var. <sup>2</sup> Arbosobo leil zi su ca mel ddei zuixl mel bei pixl gger cexr arddeirnga a, yaa dder nixmox zzar gexr nr var, zeixleixr lei Arbosobo leil zi nr ssa. <sup>3-4</sup> Nael niurbol nei acixl ddei sirnilni mel ca ddei zuixl mel bei pixl gger nr cexr, yel bbecir-bbekoxl lei Arbosobo leil zi a mel, ca mel leil armael ddei zuixl mel holcir du lei lol lalnga.

<sup>5-6</sup> Yel Yisu Zidu middurbbor lei car, yar Arbosobo dax bbeix:

“Ni leil zi dae mel nei ni leil gger dae mel ni nr li;

adoxl cu a ni leil zi dae zzeir hal mel nei

ca mel ddei zuixl mel leil weix a ni leil zi dae hal mel lei

ni dax nixmox lo-nr-dda.

Ni dder ngo leil ggecir ar ddei bei har zaxr gger dae a ni leil zi lol.

<sup>7</sup> Yar yoxl bbeix:

‘Arbosobo, ngo lei a; ni xiar dae mel bei lei a;

ngo arsae lerler nga var mel ni ddei sul jur leil vaexr deix dae ho a,’<sup>k</sup>

eine bbeix a.

<sup>8</sup> Lixlfaxr dax zox dae a Arbosobo leil cirza-hanga zi nia bbeixarnar, nael Yisu bbeix: “Ni leil gger dae mel, halae adoxl cu a ni leil zi mel nei ca mel ddei zuixl mel leil weix a zi dae eilzzu mel ni nr li, ni dax nixlox-nr-dda.”

<sup>9</sup> Yar yoxl bbeix “Ngo lei a; ni xiar dae mel bei lei a.” Yel yar dder halleix

---

<sup>k</sup>10:7 Sipi Sul 40:6-8 leil vaexr dae.

arsae zi nia bbeix goxr mel bei pixl gger a; Zidu leil zilabox loxr lol a.

<sup>10</sup> Yisu Zidu mel Arbosobo xiar dae mel bei a, yar ddei ggecir ddei Arbosobo leil cir boxl zi a dder ca mel leil seirceix-seirmaer loxr lol a.

<sup>11</sup> Arbosobo leil zi su mel bbecir-bbeni ngier dae a yar leil zi doxr bbeixarnar, ziddu ciryoxr a zi a mel cirse-cirsil lei ca ddei zuixl mel bei pixl gger nr cexr. <sup>12</sup> Nael Zidu mel armael ggecir ddei Arbosobo leil cir boxl zi a dder, cirse-cirsil lei ca ddei zuixl mel ssoxrsuxl a; yar Arbosobo yo piar a gga cux dae a. <sup>13</sup> Yar hane cirdae a Arbosobo leil xia dae a yar leil vuxryixr su ca mel leil yar qihher woxrke jjiux ji dae lol. <sup>14</sup> Yar mel Arbosobo leil cir boxl zi a dder Arbosobo ddei cassor-worssor mel leil cirse-cirsil lei seirceix-seirmaer loxr lol a nga arddeir a.

<sup>15</sup> Arbosobo ddei Xiu ddei lei niul leil saexl lol a. Yar bbeix goxr a bbeix:

<sup>16</sup> “Nixixl hal mel goxr ho a ngo yaa dax bbeix har zaxr a mel eine bei nia:

ngo ngo ddei Lixlfaxr mel yaa nixmox zzar hher ji dae lol nia, yaa olggar ddei gga hher ji dae lol nia.”<sup>l</sup>

<sup>17</sup> Yar yoxl bbeix:

“Ngo yaa ddei zuixl mel leil nei yaa Lixlfaxr dax bei nr mae bei cox goxr mel leil zeixleixr lei hol-nr-cir.”<sup>m</sup>

Arbosobo ddei Xiu ddei eine bbeix a.

<sup>18</sup> Eine nga a mel Arbosobo yaa ddei zuixl mel leil ssoxrsuxl ho a, yel yaa dder zeixleixr lei armael zuixl mel leil weix a Arbosobo leil zi nr ssa a.

### Yisu Leil Ddarzzi Su Mel Sserssei Xie Nia

---

<sup>l</sup>**10:16** Yilixlmir Sul 31:33 leil vaexr dae.

<sup>m</sup>**10:17** Yilixlmir Sul 31:34 leil vaexr dae.

<sup>19</sup> Arzzi-nimar arzzi-nimo mel, Yisu niul leil weix a sirnilni ddux a si a, yel niul dder nixmox vaervaermo Arbosobo ddei xi lavulzzar seirceix-seirmaer gaxzi giex gga ddir cexr a. <sup>20</sup> Yisu armael ggecir ddei Arbosobo leil zi a, niul leil jjiimo sixl ar zex mul gger a, niul leil Arbosobo dax ssi lol. Jjiimo eil zex mel niul leil gol dae lol cexr jjiimo zex nga a. Jjiimo eil zex Arbosobo ddei xi agala gga giex gex dae mae co gga ssi gel a Arbosobo dax cirgo a hher dae cexr.<sup>n</sup> <sup>21</sup> Yisu mel dder niul ddei Arbosobo leil zi su yarzi vaer hal ddei nga a; yar Arbosobo ddei xi ddei leil guaxr dae, <sup>22</sup> yar ddei sirnilni mel niul nixmox ddei seibeix lol, ajjix seibeix mel niul ggecir ddei leil cir xia gger a, yel niul Arbosobo leil ddarzzi gaxzi a, nixmox cirtaex-lorbba yarzi Arbosobo dax naer lei nia. <sup>23</sup> Arbosobo leil mel ddarzziddo, yar arsae bbeix goxr mel arsae bei ci, yel niul dder Yisu Zidu niul leil jiuxl lei eil ddei leil xia doxr dae nia. <sup>24</sup> Niul arsae bei a saelnei zzicarzzi leil seirseir bei lol var zzicarzzi leil perniar var arleixr xiar nia. <sup>25</sup> Niul zoxlzoxl a kebal Yisu leil ddarzzi su ca mel dax cirgo a Arbosobo leil bbeix zae gger nia. Yisu leil ddarzzi su zoxlzoxl a cirgo a nr hher hal mel dax bei mae nr ddo. Seirpor jjixr lei nixixl ddei mel cirleixr dder ci du a; yel niul zzicarzzi leil quex nia, zabbar seirseir a eine bei doxr dae nia.

### Ddarzzi Doxr Dae Nia

---

<sup>n</sup>**10:20** Yisu nr si seir halleix ca mel arsaebeilei Arbosobo ddei xi lavulzzar seirceix-seirmaer gaxzi giex gga ddir nr cexr. Arbosobo leil zi su vaer zzir ddei larnei cir koxl cir boxl a ddir cexr, nael yar Arbosobo ddei xi agala gga giex gex dae mae co dax halmaex ddir nia. Eilleix mel Yisu leil ddarzzi su ca mel Arbosobo dax ssi cexr. Eine nga a mel Yisu mel Arbosobo ddei xi agala gga giex gex dae mae hal co sael a nga. Cu'aezixr Sul 26:31-33 nei Martaexl Sul 27:51 leil biar dae.

<sup>26</sup>Niul Arbosobo ddei ddarzi mel leil saexl ho a lei halae dexryixl zuixl bei doxr arddeirnga a,<sup>o</sup> niul zeixleixr Arbosobo leil azo zi a lei yar niul ddei zuixl mel leil vuxryixr doxr. <sup>27</sup>Niul dder gexrgexr-zizimo Arbosobo ca mel leil ser car leil xia dae nei yar yar leil vuxryixr su leil faxr ggie yarzi gexrddo adoxl mel leil xia dae lalnga a. <sup>28</sup>Halleix arseir Moxrxi vaexr dae Lixlfaxr dax bei nr mae dae a, yar zuixl bei dae mel leil ca nrso ler mia a bbeix teixl lei arddeirnga a, yar leil zoxl-nr-nixr bei zil gger. <sup>29</sup>Halmel, Arbosobo ddei Ssor ddei leil i ze i su ca mel arsaesael nga var neil? Yaa mel yaa leil seirceix-seirmaer loxr lol sirnilni ddei leil i nr du, halae ca leil seirseir meixl gger Arbosobo ddei Xiu ddei leil bbeix vuxryixr. Holbbaexl yaa leil gielgiel yarzi larhor faxr mi-nr-bbe a ngo? <sup>30</sup>Niul saexl dae Arbosobo bbeix: “Ngo ca leil serpaxl su ddei nga a; ngo yaa leil bei koxl xixl nia.”<sup>p</sup> Yoxl bbeix: “Seirpor mel yar ddei cassor-worssor mel leil ser nia,”<sup>q</sup> eine bbeix a. <sup>31</sup>Arbosobo leil i ze i su ca mel cirse-cirsil lei gol dae Arbosobo leixrga gga ddir ci a mel yarzi sael gexrddo.

<sup>32</sup>Nia halleix ddei nixixl mel leil holcir dae nia. Halleix nia Yisu leil saexl ho a, goxrsol-goxrnaxr hormo pex dae a bbeixarnar, nael nia halae ssersei xie. <sup>33</sup>Cirdaetae a zzae ca mel nia leil daxmeix bbeix vuxryixr, nia leil ci; cirdaetae a zzae nia yoxl goxr sol su ca hal mel dax cir piar a bei. <sup>34</sup>Nia loxrgier dae ca hal mel leil zoxlnixr. Nia saexl, arddolcar a nia li wo ddo zzaegu seir zzir hal mel mel cirse-cirsil zza doxr dae var, yel si nia ddei zzaegu mel su si a lei, nia halae ggegge-sese a ssersei ddo.

---

<sup>o</sup>**10:26** *Niul Arbosobo ddei ddarzi mel leil saexl ho a lei halae dexryixl zuixl bei doxr arddeirnga* Zuixl eil ddei mel Yisu ca mel leil weix a si a yaa ddei zuixl mel bei pixl gger ddar-nr-zzi.

<sup>p</sup>**10:30** Semixljil Sul 32:35 leil vaexr dae.

<sup>q</sup>**10:30** Semixljil Sul 32:36 nei Sipi Sul 135:14 leil vaexr dae.

<sup>35</sup> Yel nia nixmox bbiex nr ddo, zabbar ddarzzi doxr dae a mel, Arbosobo dder nia leil daxlgaxl seir lol var. <sup>36</sup> Nia ssertexr zza nia. Eine nga a nia Arbosobo xiar dae mel bei ho a mel, nia dder Arbosobo nia leil gger nia bbeix goxr mel li wo ddo. <sup>37</sup> Hormo arleixr nr ssa mel,

“Lei su hal ddei dder lei du a; dawo nr var.

<sup>38</sup> Nael nixmox seir gaxzi ca hal ddei nixixl goxr a ngo leil ddarzzi doxr dae nia.

Yar ddar-nr-zzi arddeirnga a mel,  
ngo dder yar leil nixlox-nr-dda.”<sup>s</sup>

<sup>39</sup> Nael niul mel ddar-nr-zzi su nei Arbosobo faxr nia ca mel nr nga, niul Yisu leil ddarzzi a jiuxl wo gaxzi ca hal mel nga a.

## 11

### Arbosobo Leil Ddarzzi Su Ca Mel

<sup>1</sup> Ca mel Arbosobo leil ddarzzi a mel, hherdder yaa nga loxia dae mel yarzi loxr var saexl gaxzi, mia nr goxr mel lei yarzi zza dae saexl gaxzi.

<sup>2</sup> Halcar ca mel eine ddarzzi a, Arbosobo yaa leil kuar gger.

<sup>3</sup> Niul mel ddarzzi a niul saexl, merlo-milo mel Arbosobo ddar bbeix a, bei teixl lei a. Yel niul mia ddo mel mel azo lei nr sser bei teixl lei arddeir a.

<sup>4</sup> Yalboxr mel ddarzzi a, yel yar Arbosobo leil zi dae mel bir Gieyir zi dae mel leil hoxrsil, Arbosobo dder Yalboxr yar leil zi dae mel li a yar leil kuar gger, halae yar leil zuixl nr zza i mal gger. Yar si ho a bbeixarnar,

---

<sup>s</sup>10:38 Habagur Sul 2:3-4 leil vaexr dae.

yar Arbosobo leil ddarzzi a, halae niul dax ddar biar dae var sael a nga.<sup>t</sup>

<sup>5</sup> Yirnoxl mel ddarzzi a, yar gol dae seir dder Arbosobo yar leil zi si a; yel ca mel dder yar leil zo wo nr xie a. Yar leil zi nr si seir dder Arbosobo yar leil yarzi nixloxdda.<sup>u</sup> <sup>6</sup> Ha Arbosobo dax lei a mel, Arbosobo zza ddarzzi nia, halae yar, yar leil zo su ca mel leil seir lol var ddarzzi nia, yel Arbosobo leil ddar-nr-zzi su ca mel Arbosobo arsaebeilei yaa leil nixlox-nr-dda.

<sup>7</sup> Noxryal mel ddarzzi a, Arbosobo yar leil mia nr ddo seir hal mel bbeix gger zaxr car, yar Arbosobo leil gexr a dder cuaxr vaervaer ar jiaxl bei a, yaa ca cirhhexr-lorbba lei jiuxl wo a. Yar Arbosobo leil ddarzzi a, yar yar dax cirgo a ca hal coxr leil zuixl dixl gger a; halae Arbosobo yar leil zuixl nr zza ca i mal gger a.<sup>v</sup>

<sup>8</sup> Arbosobo Yalboxrlahar leil tiur teixl lei a, yar leil gger nia bbeix har zaxr goxr mermi hal ddei gga ssi lol a. Yar Arbosobo leil ddarzzi a, yar ssi halcar a mel arddolmaex ssi nia yar lei nr saexl seir bbeixarnar, yar Arbosobo ddei ddar no a dder ssi a. <sup>9</sup> Yar Arbosobo leil ddarzzi a, yar mermi hal ddei gga ngol hher dae. Yar surzzi bei teixl lei xigex gga hher dae. Yar ssor Yirsar nei yar lilbol Yargel lei eine hher. Yaa mel Arbosobo bbeix har zaxr goxr mel li wo su ca mel nga a. <sup>10</sup> Yalboxrlahar eine bei a mel, yar Arbosobo xiar dae a zi teixl lei cirse-cirsil zza dae var zzi hal ddei gga hher loxia a nga arddeir a.<sup>w</sup>

<sup>11</sup> Yalboxrlahar zzir dae a Arbosobo arsae bbeix a mel dder arsae bei, Sala aniu xiu nr var halae yarzi mar<sup>x</sup> bbeixarnar, nael Yalboxrlahar

---

<sup>t</sup>**11:4** Cuaxlsixljil Sul 4 leil biar dae.

<sup>u</sup>**11:5** Cuaxlsixljil Sul 5:18-24 leil biar dae.

<sup>v</sup>**11:7** Cuaxlsixljil Sul 6-8 leil biar dae.

<sup>w</sup>**11:10** Qirsixlluxl Sul 21 leil biar dae.

<sup>x</sup>**11:11** *Sala aniu xiu nr var halae yarzi mar* Xilaxl ddar sul cirberber a



halae Arbosobo yar leil anix gger ddarzzi. <sup>12</sup> Yalboxrlahar ca sima sael a nga a bbeixarnar, nael yar giedae ca mel mel merlabbor gie mel sael a nei neixvi qier leil sa mel sael a miur.<sup>y</sup>

<sup>13</sup> Ca eil mel mel si lo zzezze lei ddarzzi dae mel nga a. Yaa mel halae Arbosobo yaa leil gger nia bbeix har zaxr goxr hal mel li nr wo seir, nael yaa vimirmir arleixr mia wo lalnga lei nixmox zzar dder ggese. Yaa halae yaa middurbbor ngol hher dae lalnga cexrssexl. <sup>14</sup> Ddar eil mel bbeix su ca mel mel merlabbor goxrjia ddei leil zo dae. <sup>15</sup> Yaa halleix ddux lei goxrjia ddei leil xiar dae arddeirnga a mel, halae jjixr cexr seir. <sup>16</sup> Nael yaa merlabbor ddei goxrjia yarzi naxrcixl hal ddei leil li niazzir lalnga. Yel Arbosobo lei yaa leil zzi ar ddei bei har zaxr gger dae ho a, yaa Arbosobo leil “Ni mel ngua ddei Arbosobo a” eine bbeix a lei, Arbosobo seixl-nr-da.

<sup>17</sup> Yalboxrlahar mel ddarzzi a, Arbosobo yar leil sixr i car, yar dder yar ssor Yirsar leil Arbosobo leil zi. Yar mel Arbosobo bbeix har zaxr goxr mel li wo su ca ddei nga a; nael yar halae yar ddei ssorzil ddei Arbosobo leil zi yuex. <sup>18</sup> Yar ssor ddei leil bbeix ci a mel Arbosobo Yalboxrlahar leil bbeix: “Yirsar xiu teixl lei mel saelnei ni giedae ca suax,” eine bbeix goxr a. <sup>19</sup> Yel Yalboxrlahar zzir dae a Arbosobo ca si ho mel leil lei gol du xixl lei lol var. Yar ssor eil ddei mel si a, yoxl jiuxl xixl wo sael a nga a.<sup>z</sup>

<sup>20</sup> Yirsar mel ddarzzi a, yar dder yar ssor Yargel nei Yirseixr yaa nr hieni leil arddolcar a arsae lerler seir lol nia bbeix gger.<sup>a</sup>

<sup>21</sup> Yargel mel ddarzzi a, yar si niazzir dae halcar, yar dder yar ssor Yuesaexl ddei ssor nnel jia leil arddolcar a arsae lerler seir lol nia bbeix

---

bbeix: “Sala anix xiu nr var halae Yalboxrlahar yarzi mar a.”

<sup>y</sup>**11:12** Cuaxlsixljil Sul 12–21 leil biar dae.

<sup>z</sup>**11:19** Cuaxlsixljil Sul 22 leil biar dae.

<sup>a</sup>**11:20** Cuaxlsixljil Sul 27 leil biar dae.

gger, halae zzargger dox dae a, Arbosobo leil bbeix zae gger.<sup>b</sup>

<sup>22</sup> Yuesaexl mel ddarzzi a, yar si niazzir dae halcar, yar dder arddolcar a Yirsaexllixl su ca mel Aezixr goxrjia gga ddux lei nia eine bbeix zaxr. Yar halae yaa leil arddolcar a yar ddei hherggar mel arddolmaex ba mal nia miardal.<sup>c</sup>

<sup>23</sup> Moxrxi yarbbor yarma mel ddarzzi a, yaa aniuX ddox leil soxiu bbo kerzi a. Yaa zzirmar miardal dae ddar mel leil nr gexr, Moxrxi leil xiu teixl lei a, yar yarzi zae, yel yaa aniuX ddox leil seixl nr yuex.<sup>d</sup>

<sup>24</sup> Moxrxi mel ddarzzi a, yar vaer ho a dder Aezixr goxrjia zzirmar ssormaer ddei ssor bei nr yuex. <sup>25</sup> Yar Arbosobo ddei cassor-worssor mel dax cirgo a goxr sol dae lei ddo, goxr seir lotuxr a zuixl bei ssi eine nr bei. <sup>26</sup> Yar mel arddolcar a Arbosobo yar leil gger hal mel li wo loxia, yel yar zzir dae a Zidu leil weix a si yar leil bbeix vuxryixr a lei bir Aezixr goxrjia ddei cirza-hanga naxrcixl zzir hal mel li wo leil seir leixl. <sup>27</sup> Yar ddarzzi a, yar Aezixr goxrjia zzirmar ddei seifu faex lei a lei nr gexr, Aezixr goxrjia ddux a. Yar ca mel mia nr ddo Arbosobo ddei leil mia sael a nga, yel yar yarzi sael ssertexr zza. <sup>28</sup> Yar ddarzzi a, yar dder Yuelyuel jiax goxr halae alddur peixl ddei leil sirnilni mei deix,<sup>e</sup> yel Aezixr goxrjia ddei ssor vaervaer mel leil bei zil gger su tisir ddei leil Yirsaexllixl su ca mel ddei ssor vaervaer mel leil bei zil nr gger lol.<sup>f</sup>

<sup>29</sup> Yirsaexllixl su ca mel mel ddarzzi a, yaa Neixvi Nilni mi hal bbe gga

---

<sup>b</sup>11:21 Cuaxlsixljil Sul 48 leil biar dae.

<sup>c</sup>11:22 Cuaxlsixljil Sul 50:22-26 leil biar dae.

<sup>d</sup>11:23 Cu'aezixr Sul 2:1-8 leil biar dae.

<sup>e</sup>11:28 *yar dder Yuelyuel jiax goxr halae alddur peixl ddei leil sirnilni mei deix* Moxrxi armael bei lar nr nga nei, yar lei Yirsaexllixl su ca mel leil arsae goxr nia mul gger.

<sup>f</sup>11:28 Cu'aezixr Sul 12 leil biar dae.

ssi gel car a lei hieltebbor ssi dae mel sael a nga, nael Aezixr goxrjia su ca mel ssi gel a qie, ajjix mel dder yaa leil milhex gger a niul zil a.<sup>9</sup>

<sup>30</sup> Yirsaexllixl su ca mel mel ddarzzi a, yaa Yilixlge zzi ddei leil zaza-lili sir ni ssi ho a, zzi weixrqiaxr ddei dder de ze i a.<sup>h</sup>

<sup>31</sup> Ggecir vurlel su Lahexr mi ssormaer hal ddei mel ddarzzi a, yar mermi hal ddei leil ker i lei su ca mel leil beijjiu a, yel yar leil dder Arbosobo ddei ddar nr no su ca mel leil sael a bei zil nr gger.<sup>i</sup>

<sup>32</sup> Holbbaexl ngo zeixleixr biar ze i si nia seir a ngo? Hane nga a Zidixl, Bala, Casui, Yefuxrta, Daxlweixl, Sarmur'aer capor eil mel nei xiezi mel leil ngo arddol cir ni biar ci a saelnei biar jjia ddo bbeixleir? <sup>33</sup> Yaa mel ddarzzi a, kebal goxrjia leil bei leixl gger a; yaa bbaehhexhhexmo bei a; yaa Arbosobo yaa leil gger nia bbeix har zaxr goxr hal mel li wo a; yaa hhemar ddei meir ddei leil lei ddaexrcir gger a; <sup>34</sup> yaa adoxl herhelher bbiur dae hal mel leil lei bei zil gger a; si altor darsisi sser a yaa leil seixl zil gger niazzi dae lei yaa pato wo a; yaa azo lerler bei ci nr xie hal mel lei bei ci xie a; yaa zaxlddaexr a lei yarzi ddaexr sexr yel kebal goxrjia su ddei meixr mel leil deil leixl gger a. <sup>35</sup> Ssormaer armel ddei cirssor mel si a lei yoxl gol du xixl lei a. Ca cirmelmel a si ho a yoxl gol du xixl lei yarzi seir olga sixl hal ddei li wo niazzi a, si yaa leil yarzi gexrddo bixr halae yaa leil ge ji dae bbeixarnar, yaa halae Arbosobo leil ddarzzi doxr. <sup>36</sup> Ca cirmelmel leil a nael si yaa leil bbeix vuxryixr, yaa leil deil, cirmelmel leil a nael si yaa leil neixl gex du lei, yaa leil cageggie ge ji gger. <sup>37</sup> Ca cirmelmel leil a zzae legelbbe zax zil gger, cirmelmel leil a zzae nr zeixl te caer mal gger, cirmelmel leil a zzae altor seixl zil gger. Cirmelmel a zzae yoxl ya zzi nei acixl zzi wol dae a cirmaex-hanga ssi, yaa yarzi goxr

---

<sup>9</sup>**11:29** Cu'aezixr Sul 14 leil biar dae.

<sup>h</sup>**11:30** Yuesuyal Sul 6 leil biar dae.

<sup>i</sup>**11:31** Yuesuyal Sul 6 leil biar dae.

sol, si yaa leil bixr, yaa leil ci. <sup>38</sup>Yaa mipaerbbae gga nei wordabbor ssicixl-ssige ssi dae, lagiex gga nei doxzi gga pahher dae. Middurbbor ca mel yaa dax hher dax nr piar.

<sup>39</sup>Ca eil mel mel Arbosobo leil yarzi ddarzzi a, Arbosobo yaa leil kuar gger, nael yaa Arbosobo yaa leil gger nia bbeix har zaxr goxr mel halae li nr wo seir. <sup>40</sup>Arbosobo niul leil bei har zaxr gger dae hal mel mel seir zzir mel nga a; yel ca hal mel mel niul leil xia dae a saelnei seirseir mel li wo a, seirceix-seirmaer loxr var.

## 12

### Arbosobo Yar Aniux Mel Leil Mul

<sup>1</sup>Arbosobo leil ddarzzi su ca eil ke mel niul leil zaza-lili weixr gex dae, yel niul dder niul leil Arbosobo dax bei nr mae lol var cirza-hanga hal mel bei nr ddo, halae niul bei meixr niul leil gga gex dae var zuixl mel bei nr ddo, niul zabbar sser gex dae a Arbosobo niul leil bei lol niazzir mel bei ssi nia. <sup>2</sup>Niul Yisu leil i doxr dae nia. Yar mel niul leil yar leil ddarzzi beil lol su nei ddarzzi gaxzi lol su ddei nga a. Arddolcar a yar ggese var yar saexl, yel si yar leil sixrzixljiaxl leil diexr ngexl gger a goxr sol lol, yar leil seixlda lol a lei yar sser gex dae. Eilcar yar Arbosobo ddei baxrde yo piar a gga cux dae ho a. <sup>3</sup>Zuixl bei su ca mel yar leil dir a, yar arsae ssersei xie, nia holcir dae nia. Eine nga a mel, nia bei le nr var, nixmox bbiex nr var.

<sup>4</sup>Nia zuixl mel leil dir a halae sirnilni ddux a si lo nr ci seir. <sup>5-6</sup>Arbosobo mel arbbor ssor leil quex mel sael a nia leil quex, nia hol-nr-cir a ngo? Yar bbeix:

“Albor, Seirpor perniar dae ca hanga mel, yar dder guaxr,  
ssor bei lol dae hanga mel yar dder yaa leil faxr,

yel Seirpor nia leil guaxr, nia leil mul gger a, nia i ze i nr ddo,  
yar nia leil bota a lei nia nixmox bbeix nr ddo, ”<sup>j</sup>

eine bbeix a.

<sup>7</sup> Nia mel Arbosobo ddei ssor nga a, yar dder nia leil guaxr, nia leil mul gger, yel nia ssessei xie nia. Arbbor mel ssor leil nr guaxr arddollei bbeixleir? <sup>8</sup> Aniux cirddeir-hanga lei yarbbor yar leil guaxr. Arbosobo nia leil nr guaxr, nia leil mul nr gger arddeirnga a, nia dder yar ddei ssorga nr nga. <sup>9</sup> Niul leil xiu su arbbor ddei niul leil guaxr, niul leil mul gger a lei niul yar ddei ddar no, yar leil i du. Halmel, Merhhexr Arbbor ddei leil gielgiel niul yar ddei ddar no nia. Eine nga a niul cirse-cirsil olga zza. <sup>10</sup> Niul leil xiu su arbbor ddei mel, yar zzir dae a hoxr hal mel dax zox dae a, niul leil arleixr guaxr arleixr mul gger. Nael Merhhexr Arbbor niul leil guaxr, niul leil mul gger a mel, niul leil seir lol a, yar sael a seirceix-seirmaer loxr lol niazzir a nga arddeir a. <sup>11</sup> Niul leil guaxr dae nei mul gger dae halcar mel niul nixmox zzar ggese nr nga a nei zzasol, nael halcar goxr gel lei ho a, niul yar mul gger dae mel dax bei mae dae a mel, niul nixixl goxr a dder hoxrhoxr mel bei ssi var, halae nixmox zzar zzaso var.

<sup>12</sup> Yel nia leixrhher wor-nr-ni nei cizixlgex wor-nr-ni mel leil zeixleixr worni du lei lol nia. <sup>13</sup> Nia armael leil jjiimo zzalzzar ar zex ggu gger nia. <sup>k</sup> Eine nga a mel qihher pirdael dae halbbor waer teixl si nr var, doxgoxleixr kor var. <sup>l</sup>

---

<sup>j</sup>12:5-6 Zeyixr Sul 3:11-12 leil vaexr dae.

<sup>k</sup>12:13 Zeyixr Sul 4:26 leil vaexr dae.

<sup>l</sup>12:13 *Nia armael leil jjiimo zzalzzar ar zex ggu gger nia. Eine nga a mel qihher pirdael dae halbbor waer teixl si nr var, doxgoxleixr koxl var.* Jjiimo zzalzzar ggu gger su ca mel velper a Yisu leil ddarzzi su mel leil

## Arbosobo Ddei Ddar Noni Nia

<sup>14</sup> Nia arsaе bei var arsaе bei a ca cirddeir-hanga dax toltor a bei nia, seirceix-seirmaer loxr nia. Ca mel zuixl zza arddeirnga a mel dder Seirpor leil mia wo nr ddo. <sup>15</sup> Nia zzicarzzi leil quex nia, zuixl bei ssi nr ddo. Nia dax ca mel gga arseir leil lei Arbosobo yaa leil seirseir meixl gger dae hal mel nr li bei lol nr ddo. Nia fadae nia. Nrbba nrbba Arbosobo ddei ddar mulggersu hal mel leil nia ca mel gga ddux lei lol nr ddo.<sup>m</sup> Nr nga a nia leil zzi dax toltor a nr nga lol lei, halae ca mel leil zuixl bei ssi lol lei. <sup>16</sup> Capor ssormaer buxlguaer-laxlsixr bei nr ddo, arseir lei kerjiaer ssi nr ddo. Yirseer sael a Arbosobo leil i nr du bei nr ddo. Yar mel zzorddu ardoxr leil weix a dder yarbbor dax li wo mibbe mel lei vur pixl gger a. <sup>17</sup> Giedae yar arsaesael nga mel nia lei saexl. Yar yarbbor leil qiuxr a yar leil seir lol niazzir, nael yarbbor yar leil ddar-nr-koxl a. Yar nge dae a yarbbor leil qiuxr doxr a lei guaxr-nr-zoxr a.<sup>n</sup>

<sup>18</sup> Nia mel Yirsaexllixl su sael a Xinaer ae worga hal ga dax lei ci nr nga. Worga hal ga leil mel mox nr ddo, adoxlle zza, alker kersil-kerbbax,

---

bbeix. Qihher pirdael dae su ca mel Yisu leil lalal a ddarzzi su ca mel leil bbeix. Ddar eil qier ddei yilsi mel dder vever a Yisu leil ddarzzi su hal mel mel lalal a ddarzzi su hal mel leil beijjiu nia.

<sup>m</sup>**12:15** *Nrbba nrbba Arbosobo ddei ddar mulggersu hal mel leil nia ca mel gga ddux lei lol nr ddo. Xilaxl ddar bbeix: “Duxr niar dae yarzzei zzei leil nia dax ner teixl lei lol nr ddo.”*

<sup>n</sup>**12:17** Yirseer mel ssorvaervaer ddei a. Yel yaa ddei leiddur dax zox dae a mel yar cirza-hanga lei bir yar nimar leil li wo miur leixl nia. Nael yar mel zzorlabox ardoxr li niazzir a, yar ddei quexrlixl mel yar nimar leil vur gger a. Cuaxlsixljil Sul 25:27-34 nei 27:30-40 leil biar dae.

yarzi neixmar, mersi daxlgaxl jia dae, <sup>19-20</sup> halae cuxgexdaex baerlae mex ggje nei Arbosobo ddei qiurte bbejjiur ddo. Qiurte hal ddei mel Yirsaexllixl su ca mel leil miardal dae a bbeix: “Ha worga eil ga dax lei naer a mel, zzeir a nga zzorbbeixlei legelbbe sser a zax zil gger nia,” eine bbeix a. Yel Yirsaexllixl su ca mel qiurte eil ddei leil bbejjiur a dder gexr a, Arbosobo leil qiuxr a zeixleixr yaa dax ddar bbeix lol nr bel a.

<sup>21</sup> Halcar a mel yarzi sael gexrddo a, Moxrxix lei bbeix: “Ngo gexr a lixlix-laexlaex go dae a.”<sup>o</sup>

<sup>22</sup> Nael nia mel Xi'a ae worga ga leil lei ci arddeir a. Halmaex mel hherdder cirse-cirsil lei gol dae Arbosobo ddei zzi ddei nga a; hherdder merlabbor ddei Yiluxlsaler<sup>p</sup> ddei nga a. Tisir hormo du hormo meixr lei ggegge-sese arla halmaex hher dae. <sup>23</sup> Nia Yisu leil ddarzzi su cir dax lei ci a. Yaa mel Arbosobo ddei anix vaervaer sael a nga. Yaa ddei mi mel mel merlabbor gga vaexr deix dae ho a.<sup>q</sup> Nia ca maelmaerjia leil ser su Arbosobo meixsaer qier leil lei ci a. Halae zuixl nr zza ca mel ddei xiu mel dax lei ci a. Yaa mel seirceix-seirmaer loxr a. <sup>24</sup> Nia yoxl Yisu meixsaer qier leil lei ci a. Arbosobo zeixleixr eilleix ca mel dax bbeix har zaxr a mel Yisu leil sser dae. Yel Yisu mel Arbosobo nei ca mel aga ca ddei nga a. Nia halae sirnilni beil dol ggje lei ci a. Yisu ddei sirnilni mel bir Yalboxr ddei sirnilni mel leil seir leixl.<sup>s</sup>

<sup>25</sup> Hane nga a nia dax ddar biar su ddei leil no-nr-ni bei nr ddo. Ca mel

---

<sup>o</sup>**12:21** Cu'aezixr Sul 19 nei 20 leil biar dae.

<sup>p</sup>**12:22** *merlabbor ddei Yiluxlsaler* Merlabbor ddei Yiluxlsaler mel Qirsixlluxl Sul 21 leil biar dae.

<sup>q</sup>**12:23** Qirsixlluxl Sul 3:5 leil i cexr.

<sup>s</sup>**12:24** Yisu ddei sirnilni mel Arbosobo leil ca mel leil ssoxrsuxl lol. Yalboxr ddei sirnilni mel Arbosobo leil yar leil vuxryixr su ddei leil bei koxl xixl lol. Yalboxr leil Cuaxlsixljil Sul 4:1-12 leil biar dae.

middurbbor yaa dax ddar biar su ddei leil no-nr-ni lalnga lei Arbosobo yaa leil faxr mel, niul merlabbor gga niul dax ddar biar su ddei leil no-nr-ni a gielgiel Arbosobo niul leil nr faxr arddollei bbeixleir?<sup>t 26</sup> Yar Xinaer worga leil ddar biar dae car yar ddei qiurbbi ddei mel middur ddei leil lei le du lei lol a.<sup>u</sup> Nael eilboxl yar yoxl bbeix har zaxr a bbeix: “Zeixleixr halboxl ci a ngo middur ddei leil lar le du lei lol nr nga a nei, merlabbor ddei leil lei le du lei lol nia,” eine bbeix a.<sup>27</sup> Yar “zeixleixr halboxl ci a” eine bbeix a mel dder bei teixl lei hazza leil lei le du lei lol a bei xiaxr gger a; yel le du lei nr var hal mel leil lar zza dae lol a.

<sup>28-29</sup> “Niul ddei Arbosobo ddei mel nr seir hal mel leil cu pixl gger var adoxl sael a nga,”<sup>v</sup> yel yar leil bbeix zae gger nia. Niul, le du lei nr var goxr ddei gga ddir wo a mel, niul dder Arbosobo leil nawo nia, yar leil gexr halae yarzi sael i du a yar leil bbeix zae gger nia. Eine nga a mel yar leil ggese lol a.

## 13

### Maelele Biar Ci A Ca Mel Leil Quex

<sup>1</sup> Nia zzicarzzi leil arzzi-nimar arzzi-nimo ga sael a perniar doxr nia.

<sup>2</sup> Nia seivi hexl a mel, hoxrcixlcixl arla hexl nia, ca armemel a yaa saexl lei nr saexl lei dder tisir leil hexl wo a. <sup>3</sup> Nia Yisu leil weix a loxrgier dae ca hal mel leil holcir dae nia, hherdder nia lei yaa dax cirgo a loxrgier

---

<sup>t</sup>**12:25** Ca cirmemel a zzir dae a yaa dax ddar biar su middurbbor su ca ddei mel dder Moxrxi, yaa dax ddar biar su merlabbor su ca ddei mel dder Yisu.

<sup>u</sup>**12:26** Middur ddei leil le du lei halcar a mel Yirsaexllixl su ca mel Xinaer ae worga dax hher dae. Cu'aezixr Sul 19 leil biar dae.

<sup>v</sup>**12:28-29** Semixljil Sul 4:24 leil vaexr dae.



dae mel sael a nga. Nia Yisu leil weix a si yaa leil ke a goxr sol dae ca hal mel leil holcir dae nia, hherdder nia lei goxr sol dae mel sael a nga.

<sup>4</sup> Capor maerssor nr loxr seir a zzi dax naer su mel nei kerjiar su ca mel mel, Arbosobo yaa leil ser nia. Yel capor maerssor loxr ho ca mel zzicarzzi leil i du nia, ca maelmaerjjia lei zzi dax buxlguaxr-laxlsixr bei nr ddo.

<sup>5</sup> Arbosobo bbeix:

“Ngo arsaebeilei ni leil nr guaxr bei nr var,  
ni leil piar pixl gger nr var,”<sup>w</sup>

eine bbeix goxr a.

Yel nia zzirbae tuxr nr ddo, armael zza mel leil nixmox lodda nia. <sup>6</sup> Eine nga a niul dder nixmox vaervaermo bbeix:

“Seirpor mel dder ngo leil beijjiu su ddei nga a; ngo gexrddu nr zza.  
Ca mel ngo leil arsaе bei cexr bbeixleir?”

eine bbeix nia.

<sup>7</sup> Nia leil Arbosobo ddei ddar biar gger su vaervaerpor mel nia yaa leil holcir dae nia. Yaa nixixl goxr a azo lerler seirseir bei goxr halae arsaе si arleixr holcir nia, yaa sael a Arbosobo leil ddarzzi nia. <sup>8</sup> Arni, eilni nei cirse-cirsil zzezze lei, Yisu Zidu mel gierbox nixixl nr zza.

<sup>9</sup> Nia nrbba nrbba mul gger dae hal mel nia leil fur lol nr ddo. Nia Yisu leil velper a ddarzzi niazzir a mel dder Arbosobo nia leil seirseir meixl gger dae mel leil koxl nia, Lixlfaxr dax zox dae a azo zzor nia leiddur mel

---

<sup>w</sup>13:5 Semixljil Sul 31:6 leil vaexr dae.

leil koxl nr nga.<sup>x</sup> Zzorlabox hal mel mel ca nixmox taex dax azo seirggiebbæer nr zza.<sup>10</sup> Niul mel Merlabbor Arbosobo leil zi ggie ar ddei zza. Halmaex gga Arbosobo leil zi dae mel, middurbbor Sexlmuxl gga Arbosobo leil zi su mel lei zzor quexrlixl nr zza.

<sup>11</sup> Arbosobo leil zi su vaer zzir ddei ca mel ddei zuixl mel leil weix a Arbosobo leil zi car, yar zzeir ddei sirnilni mel nael Arbosobo hher ggie xi lavulzzar seirceix-seirmaer gaxzi giex gga vei dil. Zzeir ggecir ddei nael zzi mælleil vei teixl a cu pixl gger eine bei.<sup>y</sup> <sup>12</sup> Yel Yisu lei Yiluxlsaler zzi mælleil si a. Yar eine bei a mel yar ddei sirnilni mel sser a ca mel leil seirceix-seirmaer loxr lol niazzir a nga arddeir a.<sup>13</sup> Eine nga a, niul lei zzi ddei mælleil yar dax halmaex ssi a, si yar leil seixlda lol hal mel seixlda nia.<sup>z</sup> <sup>14</sup> Niul mel middurbbor cirse-cirsil lei zza dae var zzi ar ddei nr zza, niul dder eilni-arggeni ddei zzi hal ddei leil zo dae.

<sup>15</sup> Yel niul Yisu leil koxl dae a Arbosobo leil bbeix zæe gger doxr nia. Niul eine bei a mel yar leil zi dae sæel a nga. Hherdder yar mel niul Seirpor a cexrssexl.<sup>16</sup> Niul seirseir bei holcir dae nia, zzicarzzi leil cirza-hanga gger holcir dae nia. Niul eine bei a mel hherdder zilabox mel Arbosobo leil zi dae sæel a nga a. Arbosobo mel niul yar leil zi dae eil mel leil lizoxr.

<sup>17</sup> Nia nia ddei vaervaerpor mel ddei ddar no nia. Arddolcar a yaa Arbosobo meixsaer qier leil nia leil arsæe guaxr bbeix teixl lei nia. Nia

---

<sup>x</sup>**13:9** Lixlfaer dax zox dae a zzor dae zzorlabox mel Lixlweixljil Sul 11 leil biar dae.

<sup>y</sup>**13:11** Lixlweixljil Sul 16 leil biar dae.

<sup>z</sup>**13:13** *Eine nga a, niul lei zzi ddei mælleil yar dax halmaex ssi a, si yar leil seixlda lol hal mel seixlda nia.* Ddar eil qier ddei yilsi mel dder niul halleix nixixl goxr dae hal mel sæel a goxr nr ddo a. Si niul leil vaessi zzorbbeixlei nr zzi.

yaa ddar no arddeirnga a mel, yaa dder ggegge-sese arla miar bei dae var; yaa cix arddeirnga a mel, nia dax azo seirggiebbaer nr zza.

<sup>18</sup> Nia ngua leil Arbosobo dax ddar biar gger la! Ngua zzir dae a azo bei lei ngua mel armael nixmox taex dax yixrsixr nr zza hal mel nr bei dae, cirza-hanga bei a lei ngua hoxrhoxr mel a bei dae. <sup>19</sup> Ngo yarzi nia leil qiuxr, nia Arbosobo leil qiuxr a ngo leil nialngasael nia dax halmaex jjixr lei lol.

<sup>20-21</sup> Arbosobo mel ca leil nixmox zzaso lol su ddei nga a.

Yar Yisu ddei sirnilni sser a cirse-cirsil lei ca dax bbeix har zaxr. Yar niul Seirpor Yisu si ho a yar leil gol du xixl leil lol a.

Yisu mel yaloxlmo vaer zzir ddei nga a.<sup>a</sup>

Nia Arbosobo xiar dae mel dax zox dae a cirza-hanga seirseir bei dae  
mel

yar nia leil bei cexr lol nia,

nia leil Yisu Zidu leil koxl dae a Arbosobo ggese dae mel bei ssi lol nia.

Arbosobo leil cirse-cirsil lei middux lol nia. Amae!

<sup>22</sup> Ngo ddei arzzi-nimar arzzi-nimo mel, ngo nia leil xil vaer gger a arsae sisi ar zzu nr vaexr, ngo nia leil quex dae ddar mel nia zabbar a noni nia ngor!

<sup>23</sup> Ngo nia leil saexl lol nia, niul ddei nimar Tixrmoxrtaexl mel loxrgier teixl lei ho a. Yar cirleixr dder eilmaex lei ci arddeirnga a, yar ngo dax cirgo a nia leil i lei var.

<sup>24</sup> Nia nia ddei vaervaerpor mel leil nei Arbosobo ddei cassor-worssor maelmaerjjia leil zzasoso dae biex gger ssi ngor! Yixldaxllixl su Yisu leil

---

<sup>a</sup>**13:20-21** *Yisu mel yaloxlmo vaer zzir ddei nga a* Yisu leil ddarzzi su mel dder Yisu ddei ya mel nga a.

ddarzzi su mel lei nia leil zzasoso dae biex dae.

<sup>25</sup> Arbosobo nia cirddeir-hanga leil seirseir meixl gger lol nia.